

1 SAMUEL

Jawen unanmati janchaki

Yununikabu kushipabutian Israelin enabun Jehován jatu yunuai ana jatun xanen ibu wai bechipaiama inibuki. Januxun Diosun jatu medabewaya Samuel ibubun bikin bawabu kainma bakeishtabia Dioski nukuti tadi jiwe anu jiwei jawenabu Diosbe janchaxunika xanen ibu Elí medabewai Levín enabumabia jau Diosbe jawenabu janchaxunika xanen ibu ikunkainxanun, iwanan, Jehová Diosun Samuel katuniki. Ewatan jatu yunukubainai ja jawen jenea yununika kushipa iniki. Ja dikabi, ja dukun Diosun jancha yuixunika taxni taeniki. Samuel jatun xanen ibujaida katukin jatu taewaxuniki.

Jancha jatu kenexunikabu Moisin yununi pakubainkin jatun juni bakebu yusinkin ja jancha kenenikabu jaskaibu jabun jatu kenexunpaunibuki, ja año 930 Cristo judiamatianan.

Ainbu Anan bake bisma juni bake Jehován bimanikiaki, na janchadan

1 ¹ Josén bake Efraínen xenipabun maewan mati mananan anu mae betsa Ramá anu juni betsa Efraínen enabu Elcaná jiwenikiaki, Sufin enabu betsadan. Efraínen enabu Sufin juni bake betsa Tohu inikiaki. Tohun juni bake betsa Elihú inikiaki. Elihún juni bake betsa Jeroham inikiaki. Jerohammen juni bake betsa Elcaná inikiaki. ² Elcaná ain dabeya inikiaki. Jawen ainen kenadan, Ana inun Peniná inibukiaki. Penínán bake bikubainaya jakia Ana bakeuma inikiaki. ³ Año tibi Jehová kushipajaida kenwankin chaxuwan tesenxun jawen xeni menu keyuxuntan jawen nami juaxun Siló anuxun Jehová buxunxun jawenabubetan pinun ikaini Jehováki nukuti tadi jiwe puntenibu anu Elcaná kapaunikiaki, Jehováki nukuti tadi jiwe puntenibu anu jawenabu Jehovábe janchaxunika xanen ibu Elín juni bake dabe Hofní inun Finees jawenabu Jehovábe jatu janchaxunika ikaibutianan.

⁴⁻⁵ Siló anu kaxun Jehová bebunxun kenwankin jatu pimakin chaxuwan nami jua Elcanán jatu nexexunkin jawen ain Peniná inun jawen juni bakebu inun jawen ainbu bakebu kenchá bestichai nami mata waxun bestibu tibi jatu inankin jakia jawen ain Ana kenchá nami

mata dabea nexexun inanpaunikiaki, bake bitiduma wakin Jehován nemabianiken Elcanán Ana duawakin bechipajaidakanan. ⁶Elcanán jawen ain Ana bechipajaidai uinkin Peninán Ana jabi jawen janchawen jancha chakabuwakin bake bitidumawen taexun jaki kaxekin dake wapaunikiaki.

⁷Badi tibi Jehováki nukuti tadi jiwe puntenibu anu kaxun Peninán Ana jawenchains jabi bemetukin dake wakubainmis ana aka shinain kaxakin Jehová kenwanti nami piama ⁸jaskai uinkin jawen bene Elcanán jawen ain Ana yukakin: “Anaan, ¿jaskai min kaxai? ¿Jaskai min punu nukaxun piamamen? Ea en min benedan, ¿10 juni bakebun mia duawaibu keska en jaskamamen?” akin yuinikiaki.

⁹Besiaibun jawen benebe Siló anu kashian Jehová kenwanti nami pikin nuxutan Ana benikainaya jabianudi Jehováki nukuti tadi jiwe puntenibu anu Elí jawenabu Diosbe jatu janchaxunika jiwe dapi jawen tsautiki tsauxun uianyan ¹⁰⁻¹¹Elí dapi jua nia nui juinti nishma punu nukajaida kaxai jeneama Jehová yubakin yuikin: “Jehová kushipajaidatuun, eadan, en bakeuma min dayadu en nuitapajaidaii. Ekidi shinankin juni bake min ea inantiduki. Min ea bimaiwen taexun jiwekunkainkin jau mia dayaxunkin mia duawakubainxanun ja en bake medibi mina en mia wamakatsis ikaii. En juni bake min ea bimaima jawen unanti watidan, tsuan jawen bu mexteama ixanikiki”, aki

¹²⁻¹³jancha chaipakin Anan dayuikin jawen kexa bestiwen janchakin xabakabi janchama keba keba ibestiai Elín uinkin jawen jancha ninkama paean dabanen shinankin ¹⁴Ana yukakin yuikin:

—¿Jawatian min paean min bepe ikai? ¡Vino min akai jenediwe!— aka ¹⁵Anan kemakin yuikin:

—En xanen ibuun, en jaskamaki. Vino inun nuxuti betsa paepa en akamaki. Jakia en nuijaidai inun en shinanajaidai en jawen mawakatsis ikin dasibi Jehová bebunxun en yuikin keyui ikaii. ¹⁶“Ainbu chakabuki”, ikin ekidi shinanyamawe. Jakia en punu nukai nuitapakidan jaskatima en Jehovábe janchayua min ea uinkin aki ikaii, en paean keskadan— aka

¹⁷Elín kemakin yuikin:

—Jaska min yukaxu keska Israelin mekenika Diosun jau mia axunxanun unanuma inun kadiwe— aka

¹⁸kemakin:

—Jaskakenan, pejidaki. En ma kaii— abaini janua juanu jawenabuki nukutan jatubetan pi ana jawa punu nukataskama ikunkainikiaki.

¹⁹Uxashini penama bestentan Jehová kenwantan chintunkaini jatun mae Ramá anu jikimabu jawen ain Ana Elcanán chutakubainaya jaska Anan yukakin ea ashian Jehován ninkaimaxun shinankin ²⁰medabewaya Anan ma bake bi tuyaima ewatan juni bake kaian Jehová ma yukakin ea akimawen taexun kenakin: “Samuelki”, anikiaki.

²¹Janua año betsatian Siló anuxun Jehová kenwankin chaxuwan nami Elcanán jawenabu paxkaxuntan jawen kenwanti nami ana pinun, iwanan, jawen ain dabe inun jawen bake dasibibu iyukatsis ikaya ²²jakia Ana kakatsi ikama jawen bene yuikin:

—En mibe ana kayuamaki. En baken chuchu jenetanaya besti Siló anu mibetan nukun bake iyuxun jau Jehová besti dayaxuni jadi niti itan jiwekunkainxanun ja besti nichinxuni en kaxanai— aka

²³jawen bene Elcanán kemakin yuikin:

—Jaska min shinain keska akubainwen. Chuchu jenediamaken jabianu jiweyuwe. Jaska Jehovábe min yubakaima axunxanwen— atan jawenabu iyui Siló anu katani juaya janu jawen ain Ana bashikuima jawen bake yume wakubainkin chuchu jenematan ²⁴ma chuchu jenebiaima bakeishtabiaken Siló anu Jehová nukuti tadi jiwe puntenibu anu iyukin 3 ina awa bake inun xekiwan trigo 22 litro inun bichi sakuki vino matadi buxuin Siló anu jikitan ²⁵ina awa bake buxuan Elí inanbu Jehová menexunkin keyuaya januxun jatun juni bake Elí uinmakin ²⁶Anan Elí yuikin:

—En xanen ibuun, badi betsatian min uianyan en eskayama mia uinun ninkawe. Chanima mia dapixun ea ainbun en kexa bestiwen Jehová en ea akin yukajaidai uinkin en paeen keska min ea yuiyamadan, en eaki. ²⁷Jau ea juni bake inanun, iwanan, Jehová yukakin en ea aka ea ma inanyamadan, na jabiaki. ²⁸Jaskawen taexun en Jehovábe yubakani medibi jawena ma en inankin nichinxuniyuaki, jau jawen jiwea jidabiwendi Jehová dayaxunkunkainxanunan. Mian yume waxunkin dayamaxunkubainxanwen— aka

ninkatan benimai ibu wai Elí Jehová bebun main beti ixun kenwanikiaki.

Dios kenwain Ana kantanikiaki, na janchadan

2 ¹Eska janchawen Anan Jehová kenwain kantakin yuibainkin: “Jehováan, min ea kushipa bena inainwen taea mia shinain en juinti benimaii.

Min ea medabewaimawen taexun

eki kaxemisbu jatu binui benimajaidakin en jatu chitetiduki.

Min ea medabewaimawen taea en benimaii.

² Jehováan, tsua medibi mia keska jayamaki.

Nukun mekenika Diosuun, min nuku mekemis keska tsua jayamaki.

Tsuan mia binua ana betsa jayamajaidaki.

³ Nukun mekenika Diosun dasibi unanmiswen taea jau kein tsua janchayamakubainunbunwen.

Jaska yudabun amisbu unanti wakin

pepawen inun chakabuwen min jatu kupimiski.

4 Tsakanamemis kushipabun kanun tekekubainkin
babuaibu jawen kushipa Jehován jatu sawemamiski.

5 Uatian piti texe jayabiani
jafia natian juni betsa dayajaidaxunkin misi tudeishta besti
bimisbuki.

Jafia piti jayama bunikunkainima
eskatian ana buniamama yaniwamisbuki.

Ainbuaibu bake bitiduma ibiani
eskatian ma 7 bake jayaki.

Jafia ainbu bake ichapa jayanibu
eskatian bakeuma ji xana keskabuki.

6 Jehován nukun jiwea nuku mebinbiatan
anu nuku inantiduki.

Nuku jatu maiwamabiatan
jatun nuku ana benibidantiduki.

7 Mabuya inun mabuuma Jehován nukun wamiski.

Janua nukun kushipa nuku mebinbiatan
chipu ana kushipa nuku inantiduki.

8 Diosun mai jidabi dami wakin jaki maputi wanidan, jawenaki.

Jaska wakin dami waxun jaki dasibi yunukin mapunbauniki.
Jaska dami wani jawen kushipawen taexun

mai anu mania nuitapai jawauma jiweabu medabewakin jatu
benimiski.

Ja dikabi chaka putati anua pei ea imisbu medabewakin jatu
kenatan

xanen ibubube jatu tsauntan

jau yudabun jatu kenwanunbun Jehován jatu jaska wamiski.

9 Jawen kushipawen tsuan ibubis binutidubumawen taexun
jawen jancha chibain chintuinsbama Jehován jatu mekekubainmiski.

Jafia tsuada chakabukin ninkaisbama jatun chakabuwen
mawakubainmisbuki,

meshu medanua debua keskaidan.

10 Naiudia kana tun ikainkainai jatuki yunua

tsuabuda jaki sinataibu Jehován jatu yamawakubainmiski,
mishki tude tude aka keska wakinan.

Xanen ibu katuxun kushipa inani

ana jawen kushipa binumatan Jehován mai jidabi anu jiwebaunabu
jawen unanti watan kupikin keyuxanikiki”,

ishinken

11 Janua Elcaná jawenabube jawen mae Ramá anu chintunbaini jikiabun
jafia jau Elín yunua Jehová dayaxunkunkainxanun jawen juni bake
Samuel Anan bashixunbainikiaki.

Elín juni bake dabe chakabujaida inibukiaki, na janchadan

12-13 Elín juni bake dabe jawenabu Diosbe jatu janchaxunikabia Jehovákidi jawa shinan pewama chakabukubainaibun jatunabun Jehová benimawanun, iwanan, Siló anu jatun inabu bexun tesentan dashpexun jawen xeni dukun bitan jau Diosbe jawenabu janchaxunikatun Dios kuaxunkin menuxunun janu Jehováki nukuti tadi jiwe puntenibu anu bua ma jawen xeni menukin keyuxunken januxun jawen nami mexte mexte atan kenti ewapaki nami juabu kukatsa ikaya Diosbe janchaxunikan dayadu betsa jawen chachitan nexetiya juxun 14 kenti ewapaki kukatsa ikai anu pukuxun jadatuda nami betankin nexexun jawen tsuma anu butan butanmisbu Siló anu buxun Israelin enabu dasibibun jatun ina inankuin beabu Elín bakebun jatu ichakawakin jabiaskas jatu wapaunibukiaki. 15 Jatun beya jaskabia jawen xeni chi tapu anu menukin taewadiamabiaken Diosbe janchaxunikan dayadu juxun Jehová kenwankin menukatsi ikaibu jatu yuikin: “En tsuma Diosbe jatu janchaxunikan nami xui pikatsis ikikiki. Ja nami paxa ea inanwen. Matun nami jua danankin bechipaiaimaki. Nami paxa besti bikiki”, aka 16 jakia Israelin enabun jatun beya pepa kanekatsi ikama chibankin kemakin yuikin: “Jaskamaki. Ja dukun jawen xeni jau menukin ea keyuxununwen. Jaska waxun jawada bechipaiai min tsuma Diosbe nuku janchaxunikan bitiduki”, aka jakia jawen dayadun kemakin yuikin: “Jamaki. Ikis jawaida ja dukun ea inanwen. Min ea inanma ninkamas mia mebintan nun buxuaiin”, aka 17 Jehová inankuin nami jawenabiaken ja bedunanbun ibubis chakabukin ja inankuin Jehová bexuanbu jawen bedubi atimapajaidawakin Jehová kenwanti beya danankin Jehová sinatamajaidaibun

18 jaskabiaibun Samuelin efod tadi manyunepa yuda puchinin kesua sawexun bakeishtan Jehová duawakin Diosbe jatu janchaxunika xanen ibu Elí medabewakubainaya 19 año tibi tudu tadi bena waxuntan jawen ibubun Jehová kenwankin jawen kenwanti nami pinun ika Siló anu Jehováki nukuti tadi jiwe puntenibu anu jawenabu Elcanán iyui kai jawen benebe Ana kakin Samuelin tadi bena año tibi buxuntantanmis 20 jawen bake Samuel duawaya año tibi Elín uinkin Elcaná inun jawen ain Anan jancha pepawen ana jatu yuikin: “Jehová duawamakubainkin jawen bake iyua inankin yunuimawen taexun min ain Ana bake ichapa bimakin Jehován jau mia manakuxanunwen”, jatu wa benimabaini jatun jiwe anu chintuanbu 21 Ana Jehován duawakin medabewaya bake bitan kainpakemis atimas 3 juni bake inun 2 ainbu bake Ana jayaken janua Jehován bedubi Samuel yumekunkaini

22 Elí ma anibujaidakunkainaya jawen bakebun Israelin enabu beabu jatu ichakawakubainkin Dioski nukuti tadi jiwe puntenibu jikiti xui

anuxun ainbuaibu dayaibu chutamisbun Elín unanxun ²³jawen juni bake dabe kenaxun jatu yukakin yuikin: “Jaska man chakabukubainaibu dasibibun matu uin eki chanikubainkanikiki. ¿Jaskai man jaskamismen? ²⁴En bakebuun, ana jatu jaska wayamakanwen. Matukidi janchai peama Jehován enabun matu yuankubainkanikiki. ²⁵Juni betsabe tsuada ichakani kaya jatun chakabu Jehován jatu unanti watan pewakin jatu daewatiduki. Jakia tsuabunda Jehová sinatamaibu tsuan Jehová daewatidumaki”, jatu wa ma bebunkidi Jehován jatu tenankatsi yubakashinken januxun jatun epan jancha ninkabiatan chakabu jenekatsi ikama chakabus bestikubainibukiaki.

²⁶Jabiatiandi Samuel yumekin pepa akubainaya Jehová inun yuda dasibibun bechipaikubainaibun

²⁷Jabiatiandi Diosun jancha yuixunika betsa Elí anu juxun yuikin: “Eska jancha Jehován ea yuishina mia yuinun ea ninkawe: ‘Egipto anu min xenipabu Faraón dayaxunaibun en kushipa xabakabi en jatu uinmaniki. ²⁸Chi tapu anuxun ea benimawati nami menukin keyukin inun ininti dexke ea menuxunkin ea bebun ebe janchaxunikan efod tadi manyunepa jau sawekubainxanunbun Israelin enabu anua min xenipabu Aarónen enabu en jatu katuniki, ja jawenabu ebe janchaxunika ikubainxanunbunan. Jaskawen taexun Jehová kenwankin jawada ea inankin jawen xeni jau menukin keyukubainxanunbun min xenipabu en jatu yununiki. ²⁹Ja inankuinti inun ja ea menuxunti jaska wati en jatu yunubiani danankin ¿jaskai eki dateama chakabuwakanimenkain? Enabu Israelin enabun nami ea inankuin beabu min juni bake dabe duawakin pimakin min jatu xua besti waii. ¿Jaskakin ea duawakin pewama min bakebu besti nami pepa pimakin min jatu duajaidawakubainai, ea shinan bexmas wakinan?’ ³⁰Janua Israelin enabu mekenika Dios Jehován ana mikidi yuikin: ‘Ebe janchaxunikabu jau ikubainxanunbun min xenipabu Aarónen enabu en jatu yubaniki, minabu dikabikididan. Jaska en jatu yubani en ana shinankatsi ikamaki. Jabun ea duawaibu besti eandi en jatu duawaxanaii. Jakia jabun ea danainbu eandi en jatu danandiaxanaii. En Jehován xabakabi en mia yuiiai. ³¹Min xenipabun kushipa min jayabiani en mia mebiain ma kemaikiki. Minabu junibu tsuataska mestebuama ixankanikiki. ³²Israelin enabu duawakin en jatu pepawaxanai shinain min jatu keskamawen taea sinai bika tenei punu nukakunkainxanwen, minabu anibuabumakenan. ³³Jakia minabu en jatu texe waima en kenwanti chi tapu anu ana daya jayama punu nukai keyua jatuki sinatai mapuxankanikiki, minabu eskadabes en jenekubainadan. Jakia jatidi minabu betsabu anibudiabuma tsuabuda jatuki sinatakin jatu tenankubainxankanikiki. ³⁴Jaska en mia yuixu minabu ikubainxanaibu jawen min unanun en mia yuiiai. Min juni bake dabe Hofnín inun Finees jabias díatian mawaxankanikiki. ³⁵Januxun jawenabu ebe janchaxunika

xanen ibu betsa katukin en kushipa waxanaii. Jatun pe shinankin en jancha inun jaska en bechipaiai unankin ea axunkubainxanikiki. Jaskawen taexun jawenabu xanen ibu kushipa en katuxanaii. Jau jabun ea dayaxunkubainxanunbun ja ebe janchaxunika xanen ibu benan enabu pakubainaibu en jatu jiwemakubainxanaii, niti akamadan. ³⁶Minabu texeni eskadabes jiweabun jatun piti binun ika pei jexe bestichai benai inun misi tude besti binun ika daya benai ebe janchaxunika xanen ibu bena anu buxun danti itan yukaxankanikiki' ", akin Diosun jancha yuixunikan Elí yuibaini kaken

Jehován Samuel jancha wanikiaki, na janchadan

3 ¹Elín yunua Samuel Jehová dayaxunkunkainaya jabatiandi jaska taxnimakin Jehován tsua jawenchains jancha waisma inun jatidaki tsuada xabakabi namai keskawen jatu uinmakin jawen jancha jatu yuisma ²Elín bedu betsai ma bexuxi taekin ana pe uianmaken meshu betsatian jawen dintu anu ma uxaken ³Jehováki nukuti tadi jiwe puntenibu anu janu jawen jatube yubakani jancha aduni bau aduabu inun janu dintu tadi medibi anudi bin nukaima anu Samuel daka uxaken ⁴januxun Jehován kenakin:

—¡Samuel!— aka

jatun kemakin:

—En nenuki— itan ⁵kushikaini Elí anu kaxun yuikin:

—Ma en juai jawamenkain ea yuidiwe— aka

Elín kemakin yuikin:

—En mia jawa kenamaki. Uxadi kawē— aka

janua Samuel ka uxanun ika dakaken ⁶Jehován ana kenakin:

—¡Samuel!— aka

Samuel benikaini ana Elí anu kaxun yuikin:

—Ana en juai jawamenkain ea yuiwe— aka

Elín ana kemakin yuikin:

—En bakeen, en mia kenamaki. Uxa tenenwanma uxadi kawē— aka ana ka dakaken

⁷Samuelin Jehován jancha ninkakin tapin pewadiama inun jawa Jehovákidi uindiamawen taea ⁸ma 3ki Jehován Samuel ana kenakin:

—¡Samuel!— aka jawaida bestentan ana Elí anu benikain yuikin:

—Ana en juaii. Jawamenkain ea yuiwe— aka

Jehován Samuel kenabaunbaunai atimas Elín unantan ⁹januxun yuikin:

—Ka dakaxun manatanwen. Jehován mia ana kenaya kemakin eska yuixanwen: “Min dayadun en mia ninkai ea jancha wawe”, axanwen— aka janua ana ka Samuel dakaken ¹⁰Jehová jukidan Samuel kenabaunbaunxu keska wakin:

—¡Samuel! ¡Samuel!— aka

januxun Samuelin kemakin yuikin:

—Min dayadun en mia ninkai ea jancha wawe— aka

¹¹ Jehován Samuel yuikin:

—Israelin enabu jiwebaunabu anu jawada kainmakin en jatu datea ninkai e ibaunxankanikiki. ¹² Jawenabukidi jaska en Elí yuima jawa binumama na jabia xaba betsatian en jatu bika tenemaxanai. ¹³ En jancha danankin jawen juni bake dabetun chakabuwakin ekidi jancha chakabukin yuiaibun Elín jawen bakebun chakabuwakubainaibu unanbiakin jatu nemakin pewaismawen taexun jaska en bebunkidi yuishina keska wakin jawa jeneama en jatu kupikubainxanai. ¹⁴ Eska jatu wakatsi en jatukidi yubakashinaki. Ea daewakin jatun chakabu ea buamanun, ixun, jatun inabu ichapa tesenxun jidabi ea menukin keyuxunkin inun jawada inankuin ichapawen ea daewabiabu Elín enabu jatun chakabu en jatu tede ataskama ixanai— atan kaken

¹⁵ Samuel dakayuken penama bestenxun Jehováki nukuti tadi jiwe jikiti xui bepean jaska Jehován yuiwana Samuelin shinain Elí yuikatsi ikama jawen dateaya ¹⁶ jakia Elín Samuel kena jua

¹⁷ Elín yukakin yuikin:

—Jaskada Jehován mia yuishinai jawa juneama dasibi en mia yukai ea yui keyuwe. Dasibi min ea yuiama betsa min juneawen taexun jau Diosun mia kupijaidanunwen— aka

¹⁸ Jehován jancha Samuelin Elí banabimakin juneama dasibi yui keyua, Elín ninkatan yuikin:

—Aa, ¡min ea peidawawa! Chanimaki. Nukun Xanen Ibu kayabiki. Jawenaki. Jaska bechipaiai keska jau anunwen— aka

¹⁹ Jehován medabewa Samuel yumekunkaini juni ewakunkainkin jaska Jehová yubakani jancha jawa betsa jeneama Samuelin axunkubainaiwen taexun ²⁰ Israelin enabun maiwan pakebukuan norte kexa betsa Dan anua inun sur kexa betsa Beerseba anu jiweabun yuikin: “Samuel chanima Jehován jancha yuixunika kayabiki”, iwanan, unanibukiaki. ²¹ Siló anu Samuel jiweken jabanuas Jehován jawen jancha xabakabi Samuel ana yusinkubainaya

4 ¹ Samuelin Diosun jancha ninkatan Israelin enabu mae tibi jatu yusinkubainaya

Israelin enabube Dios yubakani jancha aduni bau Filisteo nawabun jatu mebinbainibukiaki, na janchadan

xaba betsatian Israelin enabu jatu detenun ika Filisteo nawabu ichatan bei Afec anu jatun tadi jiwe puntebaunabun jatu maemai jatube detenamenun ika Israelin enabudi budiai Filisteo nawabu maniabu bebun Eben-ézer anu ichatan jatun tadi jiwe puntediabaunabun ² Filisteo

nawa detenamenikabu jahu paxkama kekutan kainbidankin Israelin enabube detenamekin taewakin Israelin enabu maemakin bai namakixun 4,000 junibu detekin tenankin jatu keyuabu ³Israelin enabu mentsisipa detenamenikabu chintunbidani jatun tadi jiwe puntebaunabu anu jikiabun, anibu unanepabun jatu yukakin yuikin: “Filisteo nawabun nuku maemaxxudan, ¿jaskai Jehová jatu nuku nemaxunama ixumen? Nukube nashui ikain jau Jehová nukuki sinataibu jatu nemakin nuku maemaxunxanun ¡Siló anua Jehová jatube yubakani jancha aduni bau binun bukanwen!” ibain

⁴jaska shinantan juni ichapa Siló anu jatu yunua buxun janua Jehová dasibi kushipabu binu keyua jatube yubakani jancha aduni bau ja querubine jamamaki Jehová mekeabu tsaumis beaibun Elín juni bake dabe Hofní inun Finees jatube budiaibun ⁵Israelin detenamenikabun tadi jiwe puntenibu anua jawen jancha aduni bau bei jikiaibu uin benimajaidai detenamenikabu dasibi sai sai ichakayamakin mai dikabi taka akaibun

⁶jaskaibu Filisteo nawabun ninkai yuka ibauni: “¿Jaskai sai sai ichakayamakanimenkain, Hebreobu anuadan?” iki jaskakenan, “Jehová jancha aduni bau jatun mae anu ma beabu ikanikiki”, ikin tapintan ⁷datekin jabun yuikin: “Jatun mae anua jaskaisbumabia jatun mekenika Dios kushipa ma beabuki. Ikis jatuki datei nun pemajaidaki. ⁸¡Nun peidawa! Ja mekenika Dios kushipa dasibi binujaidatun jau nuku achiyamanun ¿tsuan ja nuku mepanmaxuntidumen? Nun nuitapajaidai. Jawen kupiti dami kushipawen ja Diosun Egipto nawa detenamenikabu yamawanikiaki. ⁹Jaskabiaken dateama shinan chankantan nukun piaki chiti iki kushipanankanwen, babuama nun jatu maemanunbunan. Jaska nun jatu dayadu wamis keska jau jabundi nuku ayamaxanunbun chintuanma pubenkain jatube detenamenankanwen”, ikeaketan

¹⁰Filisteo nawa detenamenikabu kushibain jawaida Israelin enabu jatu maemakin detekin keyuabu jatidi paxai jatun mae tibi anu buabun ichapajaida tenankin jatu deteabu 30,000 Israelin enabu main bua detenamemisbu ma mawai keyuabun ¹¹Dios jatube yubakani jancha aduni bau dikabi Filisteo nawabun achitan jabanudi Elín bake dabe Hofní inun Finees tenandiabun ¹²jakia detenamenika betsa Benjamínen enabu paxai Siló anu kushikaini jabias xabatian jawen tadi buax pishta inun jawen yuda dasibi mai jasjaida jikiaya ¹³jabiatiandi Dios jatube yubakani jancha bau bushianbuwen taea Elín shinain nujjaidai Dioski nukuti tadi jiwe jikiti xui anu tsauti ewapaki tsauken ja juni jukidan Siló anu jikitan dasibibu jaskakanxu jatu banabima ninkai kaxai bis bis ichakayamabaunaibun ¹⁴Elín ninkatan yuka iki:

—¿Ja kaxai bis bis ikidan, jawa jaskai ikanimenkain?— ikaya
ja junin Elí yuiditanun ika jawaidakidanaya ¹⁵janua Elí ma 98 año jaya ma bexuxjaidayama tsauaki ¹⁶nukuxun ja junin yuikin:

—Detenameibu anua jadia jatu maemabidani yumantan piskukidani badikis en juaii— aka Elín yukakin:

—En bakeen, jawa matu jaska wakanxumenkain, ea yuidiwe— aka ¹⁷kemakin yuikin:

—Filisteo nawabube detenamei Israelin enabu paxakanxuki. Ja inun, jatu detekin keyukin nukunabu ichapa jatu tenankanxuki. Ja dikabi min juni bake dabe Hofní inun Finees tenandiakanxuki. Janua Dios nukube yubakani jancha aduni bau dikabi Filisteo nawabun jatu ma mebindiakanxuki— akin

¹⁸jaska yuia jawen yubakani jancha aduni baukidi Elín ninkatan ma anibu xua xankamajaida jawen tsauti ewapaki Dioski nukuti tadi jiwe beputi dapi tsaua anua manaskakain tin iki mapu tetsekea mawanikiaki. Unanti wanika Elín 40 año jatu medabewaya Israelin enabun jawen jancha ninkakubainibukiaki. ¹⁹Elín babawan, Fineesin ain tuya ma kain kema jawen yubakani jancha aduni bau ma jatu mebinkanxu inun jawen kuka inun jawen bene ma mawakanxu ninkai datei jawen bake isin pikutan june tenei uminakeakei jawen bake kaian ²⁰ja ainbu ma debuai uinkin jabun medabewakin yuikin: “Dateyamawe, juni bake min ma kaiankidan”, abiabu ninkamas ma debuken ²¹⁻²²jawenabun yuikin: “Jawen yubakani jancha aduni bau ma nuku mebinkanxuwen taea Israelin enabu ana tsuan nuku kenwankin nukukidi pe shinantidubumaki. Nun ma babuabuki. Jaskawen taea ja bakeishta kenakinan: ‘Icabod waxunanwen’ ”, anibukiaki. Jaska shinankin ja bakeishta dabikinan, Dios jatube yubakani ma jatu mebinkanxu inun jawen kuka inun jawen bene mawaxu shinankin jaska waxunibukiaki.

**Filisteo nawabun mai pakea anu Jehová jatube yubakani
jancha aduni bau bunibukiaki, na janchadan**

5 ¹Jehová Israelin enabube yubakani jancha aduni bau achixun Eben-ézer anua bukin Filisteo nawabun maewan Asdod anu bichitan ²jatun mekenika yushin Dagón kenwanti jiwe medan bichikin yushin dami Dagón dapi buxun tsauntanabu ³penama Asdod anu jiweabu kaxun Jehová jancha aduni bau bebun yushin dami Dagón main tin ika daka uintan bikin benitan jabianudi ana pewakin tsaunbainabun ⁴ana pena betsatian kaxun Jehová jancha aduni bau bebun yushin dami Dagón ana main tin iki jawen buxka inun jawen meken dabe jikiti xui naman jawen nakishkunki jawen pabu tibi tunkeakeaketan jawen yuda besti senkeama daka uinibukiaki. ⁵Jaskawen taea na jabiatian Asdod maewan anua jawenabu Dagónbe janchaxunikabu jawen kenwanti jiwe anu jikikaini jawen jikiti xui nakishkunki metsai jaki paisbumakiaki.

⁶Chipu Asdod anu jiweabu inun ja dapi jiwediabaunabuki Jehová jatuki sinatajaidakin jatu kupikin jatun yuda tibi su ika chakabuwakin

dasibi isin jatu tenema datekubainkin ⁷Asdod anu jiweabu dasibi isin tenejaidakin ja isin mebauni yuinamekin shinain: “Israelin enabu mekenika Diosun nuku inun nukun yushin Dagón kupikin xaba ichapa nuku isin tenemakubainaiwen taexun jatun mekenikan jancha aduni bau nukubun nun ana meketidubumaki”, ikeaketan

⁸jaskatan jatun xanen ibubu jau jatube ichatan pewai benunbun jatu yuibaunabu ma bea jatube ichai keyuabu jatunabun jatu yukakin yuikin:

—Israelin enabun mekenikan jancha aduni baudan, nun jaska waxankanai, nuku yuikanwen— jatu wabu

xanen ibubun jatu kemakin:

—Gat maewan anu jadi maewakin butankanwen— jatu wa

Filisteo nawabun jadi buxun ⁹Gat mae anu mistushinabun januxun Jehován jabu dasibidi jawen jatu datekin kupikin bake mishtinyanbis su imakin isinjaida tenemakin jatu nuitapawaya ¹⁰jaskawen taexun maewan betsa Ecrón anu Dios jatube yubakani jancha aduni bau Filisteo nawabun ana maewai bukin jatu anu bichibainaibun Ecrón anu jiweabun uinkin jui kushipawen jatu nemakin: “Nukudi dasibi tenan keyunun”, iwanan, “Israelin enabun mekenika Dios jatube yubakani bau man bekanai”, iake iakeibun

¹¹Diosun jabudi kupikin su ika pawakin jatu isin tenemakubainaya ja maewan anu jiweabu datechakayamakin jatun xanen ibubu jau jatu yuixuntanunbun jatu kenabu ma bei ichai keyuaibun jatu yuikin: “Israelin enabu mekenika Diosun jancha jatube yubakani aduni bau nenu man beimadan, jatu buxunditankanwen, ibubu anudan, jau nenuxun nuku dasibi tenanyamanunan”, jatu wanibukiaki.

¹²Jabu isinman jatu tenanma jatun yuda jidabi su iki keyua isin tenechakayamai kaxai bibiski ikin nenuma jatun jui kainmaibun chajaida jiwebaunabun jatu ninka keyunibukiaki.

Diosun jancha aduni bau Filisteo nawabun ana chintunwankin jatu inanibukiaki, na janchadan

6 ¹Jhován jancha aduni bau Filisteo nawabun jatun mai pakea anu buxun aduimabu jadi ⁷uxe kaya ²Filisteo nawabun jatun yushibubu kenwanikabu inun bebunkidi jabun jaskaxanai unananikabu jatu ichawaxun jatu yukakin:

—Jhován jancha aduni baudan, nun jaska watidumenkain, nuku yuikanwen. Nun jaska watan jatun mae anu ana jatu inantidumenkainan— jatu wabu

³jabun jatu kemakin yuikin:

—Diosun jancha aduni bau man ana jatu inankatsi ikai jaska besti jatu bumayamakanwen. Jehová daewakin inankuinti pepa bumaxunkanwen. Man jaska wa man xuxaxanai. Jehován matu kupikin jeneai man unanxanai, ana matu kupiamadan— jatu wabu

⁴ ana jabun jatu yukakin yuikin:

—Jehová daewakinan, ¿jawa nun inankuintidumen?— jatu wabu jatun yushibubu kenwanikabun jatu kemakin yuikin:

—Matu inun matun xanen ibubu jabias kupiti chakabu mei man bika tenedaiwen taexun mane orowen matun yuda anu su ika keska wakin 5 dami jatu amaxankanwen. Ja dikabi oro xuya keska wakin 5 dami jatu amadiaxankanwen, bestibu matun xanen ibu tibi wakinan. ⁵Man bika teneaiwen taexun su ika keska oro dami inun matun mae anuxun dasibi xuyan pikin dasibi chakabuwakin keyuaibu keska oro dami wakin keyuabu ja damiyabi inankin Israelin enabu mekenika Dios duawakin pewakubainxankanwen. Man jaska wai Jehován uintan matu inun matun yushibu inun matun mai pakea ana kupiama matu jenexanimenkain. ⁶Israelin enabu Egipto anua taxnibainpananbun Faraón inun jawenabu juinti kushikin jatu nemakubainaiwen taexun Israelin enabu mekenika Diosun jatu kupijaidaya atimas ana jatu nemama ini keskai matun juinti kushi wayamakanwen. ⁷Ina awan tadanbainkin bumati bena jatu amakanwen. Ma akin keyuabun ina awa dabe jawen bake chuchu jenemadiama tekishkunyan mapuisbuma bitan tadanti teumaxun jawen bake chuchu amai dabe chibain nemakin janu ina awa jiwe anu jatu bichixankanwen. ⁸Jaska waxun Jehován jancha aduni bau bexun tadantiki nanetan jawen daewati oro mabu inankuinti bau betsa medan ja dapi datanxankanwen. Jaska waxun jatu jenexankanwen, ina awa dabe ibubis jau butanunbunan. ⁹Israelin enabu mae Bet-semeskidi jawa jikikaunama kai peaidan, Diosun jatun nuku bika tenemai nun unanxanaii. Jakia jaskama jamakidi ja ina awa jikibainaiбудan, jawanda nuku isin tenemakin kupiai nun unantidubuki— jatu wabu

¹⁰jaska jabun jancha ninkatan jaska wakin ina awa yuxan dabe jawen bake chuchu amai katuxun jatun bake dabe chuchu putamabidan janu ina jiwe anu jatu bichixun ina awa yuxan tadanti teumadabexun ¹¹januxun Jehován jancha aduni bau bexun tadantiki nanetan jawen daewati xuya dami oro inun yuda jidabi su ika dami oro inankuinti bau betsa medan ja dapi nanetan ¹²Bet-semeskidi bai jau tanabaintanunbun ina awa yuxan jeneabu jamebi kai maan maan ikunkaini besukidi bai tanabaini jawa benuama yusiudi inun yusmaudi jikiama kayatapibainibun jachun Filisteo nawa xanen ibubun chibankubaini ja Bet-semes mai pakea kexa anu niti ixun uiainbun ¹³paxku napanpa anuxun Bet-semes anu jiweabun jatun xekiwan trigo tsekakin bewenikitankin Jehován jancha aduni bau awadan beai bechitan benimajaidaibun ¹⁴⁻¹⁵Bet-semes anu jiwea juni betsa Josué bai anu jikia mishki ewapa daka anu ina awa dabe jawen tadantiya niti ikabun Jehován jancha aduni bau inun jawen dae wati inankuinti bau betsa Jacobun juni bake Levín enabun butekin mishki ewapa anu tadi tsauanbu ja ina awa dabetan teudabebidanxu Bet-semes anu jiweabun

pekatan jawen tadanbainti kadu waxun ja ina awa dabetun bau bexu tesendabetan Jehová kenwankin ina awa dabe menukin keyuxuntan jabias xabatiandi inabu betsabudi tesenxun jawen xeni menukin keyuxun jawen kenwanti nami juaxun piaibun ¹⁶Filisteo nawabun ina awa chibanbidanabun jaska waibu dasibi uintan jabias xabatiandi Filisteo nawa 5 xanen ibubu jatun maewan Ecrón anu chintuainbun

¹⁷⁻¹⁸Filisteo nawa 5 maewan Asdod inun, Gaza inun, Ascalón inun, Gat inun, Ecrón jabu tibi bestichai ichawatan 5 oro dami su ika keska inun mae tibi kenebaunabu inun mae tibi keneuma ja 5 Filisteo nawa xanen ibubun yunukin jatu mekemis tanatan jati oro dami xuya keska ichawatan bau medan nanexun Jehová daewakatsis ikin Filisteo nawabun inankuinibukiaki. Bet-semes anu Josué bai anu ja jabias mishki ewapa Jehován jancha aduni bau janu dantanibu ikis tsuabunda uindiatidubuki.

¹⁹Jakia Bet-semes anuxun jatidibun Jehován jancha aduni bau jaskada ikimenkain ixun uke medan bepenxun ma uianbuwen taexun jatu kupikin Jehován 70 junibu tenanken uintan Jehován jati jatu debuwwen taea Bet-semes anu jiweabu nuijaidai kaxakubainkin yukakin ²⁰yuikin: “Jehová Dios medibijaidabe tsua jiwetidumaki. ¿Jaskaken nun jani yunutidumen?” ikunkainkin ²¹Quiriat-jearim anu jiweabu anu jatun jancha bumakin jatu yuikin: “Jehován jancha aduni bau achibiabainimaxun ana nuku anu yunushinabuki. ‘Jau menan bexun bidi benunbunwen’, matu washianbuki, jatu watankanwen”, aka

7 ¹Quiriat-jearim anu jiweabu bexun Jehován jancha aduni bau biwankin jatun mae anu buxun mati mananan anu Abinadabin jiwe uke medan bichixun jau mekekubainxanun jawen juni bake Eleazar katuxun jau jatun mekenun medibi watan yununibukiaki.

Israelin enabun Samuel katukin unanti wanika xanen ibu wanibukiaki, na janchadan

²Quiriat-jearim anu Jehován jancha aduni bau mekekin aduyamabu ma 20 año kaya Israelin enabu dasibibun Jehová ana jaibuwakatsis ikin yukajaidabiabu ³jatu jen akamawen taexun Samuelin jawenabu jatu yunukin yuikin: “Matun juinti jidabiwen inun matun shinan jidabiwen Jehová anu ana chintuntan man chibankatsis ikaidan, ea ninkakanwen. Nawabu matu dapi jiwebaunabun yushibu dami kenwanti betsa betsapa man jaya ana kenwanma jenekin putakanwen. Ja inun, yushin Astarté dami putakin keyutan matun jiwea jidabiwen Jehová besti duawakin ninkakin kenwankubainxankanwen. Man jaska wakubainaya Filisteo nawabun matu achinixun matu yunumisbu matu ana yunumama Jehován Filisteo nawabu babu watan matu mebikinaxanikiki”, jatu wa

⁴Samuelin jancha ikunwankin ninkatan jatun yushibu Baal kenwanti dami dasibi inun yushibu betsa Astarté kenwanti dami dasibi

Israelin enabun putakin keyutan januxun Jehová bestí kenwankin duawakubainkatsis ikin shinainbun ⁵januxun Samuelin jatu yunukin yuikin: “Israelin enabu dasibi Mispá anu jadi ichai bukanwen. Man jadi ichabu jadixun ean Jehová en matu yukakin ea axuin kaii”, jatu wa

⁶Mispá anu bui ichai keyuxun juni bestibu tibitun chacha unpax bitanxun Jehován bedubi kenwankin inankuin keska wakin mai anu unpax jukakin keyuxuntan jabatiandi samekekin dasibibun ninkaibun xabakabi jatun chakabu yuikin: “Nun jawa shinanma Jehová danankin nun chakabuwakubainshinaki. Nun ana jaskakatsi ikamaki”, ikeakeaibun Israelin enabu Samuel jatun xanen ibu unanti wanika kushipa taeaya ⁷Mispá anu Israelin enabu ma ichabu Filisteo nawabun ninkatan jatuki sinatamisbuwen taexun jatu detetanun ika Filisteo nawa xanen ibubu jawen mentsisipa detenamenika ichapabuya beaibu Israelin enabun jatu uin datekin ⁸Samuel yunukin yuikin: “Filisteo nawabu jatun kushipa jau nuku nemaxunun nukun mekenika Jehová Dios yukakin nuku jenexunyamawe”, akeakeabu

⁹⁻¹⁰chaxuwan bake bene pishta chuchu jenediama Samuelin achitan tesenxun chiwen jidabi menukin Jehován jau jatu medabewanun Samuelin yukakubainaya jatu detenun ika Filisteo nawa detenamenikabu kemaibun Samuelin jancha Jehován ninkatan jatu medabewakin jabu anu kana tun ima chakayamakin jatu dateaya ninkai datei Filisteo nawabu kushibainaibun ¹¹jatu jaska waya Israelin enabun jatu maematidubu shinain Mispá anua jawaida taxnibain jatu detenun ika, buaibun Filisteo nawabu paxaibu chibanbainkin jatu detekubainkin Bet-car anu niti itan chintunbidanaibun ¹²mishki kedan ewapa katutan unudi Mispá inun unudi Sen namakis buxun jakimatima shinanmati wakin jatu nichinmaxun yuikin: “Natian Jehován nuku medabewakin jeneama nun unainwen taea jawen kena Eben-ézerki”, Samuelin jatu wanikiaki.

¹³Israelin enabun ma Filisteo nawabu jatu maemakin keyuabuwen taea Filisteo nawabun Israelin enabun mae anu chintunkidan jatu ana meanma ikubainibukiaki, Samuel jiweatian Jehová Filisteo nawabuki sinataiwen taeadan. ¹⁴Filisteo nawabun maewan dabe Ecrón inun Gat namakis jatun mai pakea kexa dapi Israelin enabun mae inun jatun bai kesua betsa betsapa jatu mebinkin keyubianibu ana ibuwakin Israelin enabun Filisteo nawabu jatu nichinkin putakin keyutan ja dikabi Amorreo nawabu jatu nematan Israelin enabu ana jatube detenameama unanuma jatube jiwenibukiaki.

¹⁵Samuel jiweatian jatu dayaxuni Israelin enabun xanen ibu unanti wanika kushipa ikunkainkin ¹⁶año tibi Betel anuxun inun, Guilgal anuxun inun, Mispá anuxun jatu uin kakunkaunkin Israelin enabu jatun mae tibi anua bea ichaxun jatun chakabu inun jawada bika teneaibukidi Samuel banabimabu jatu daewakin janchawen jatu pewakin Samuelin

jatu yusinkubaunpaunikiaki. ¹⁷Jaskakunkauntani janua kaini Ramá anu chintuinan, jabanudi Jehová kenwanti chi tapu wani anu inun jadi jiwea xanen ibukin Israelin enabu Samuelin jatu yunupaunikiaki.

**Yununika xanen ibu kushipajaida Israelin enabu
jayakatsi yuka inibukiaki, na janchadan**

8 ¹Anibui Samuel babukin jau jabun Israelin enabu unanti wanika kushipa jau jatu ixunkubainxanunbun jawen juni bake dabe katukin yununikiaki. ²Jawen juni bake iyua jawen kena Joel inun jawen juni bake ja kachukea jawen kena Abías, Beerseba anu ja dabe jatu xanen ibuxunkin Israelin enabu yunukin taewaibun ³jatu jaska wakín jawen bakebu jatu katuxunbiaima jatun epa pepakunkainmis keskama jakia ibubis kemujaidai shinan chakakin pei june binun, iwanan, jatu yukakubainkin jawada yunuti pepa chibanma ikubainaibuwen taea ⁴Israelin enabu anibu unanepa xanen ibubu dasibi ichai keyutan Ramá anu Samuelbe janchai buxun ⁵yuikin: “Anibui min ma babuaii. Min juni bake dabetunan, min nuku amis keska nuku pewabumaki. Jaskawen taexun jau nuku yunukubainxanun yununika xanen ibujaida katukin nuku yunuxunwen, mae betsa betsapa anu nawa jiwebaunabun beya jayabu keskadan”, akeakeabu

⁶yununika xanen ibu kushipajaida yukakin ea abiabu jatun jancha Samuelin bechipaiama jaskakidi Jehovábe janchakin yuka ⁷kemakin Samuel yuikin: “Jamapai tibi minabun mia yukaibu jatu axunwen. Jatu mekei en ana jatu xanen ibuxunyananun mia dananma jakia ea jabun danain ikanikiki. ⁸Janu jatun xenipabu Egipto anua en jatu taxnimabidanaitian itiani iki ikanikiki, jaska ea akubidanibu keska mia waidan. Jaskawen taexun yushibu betsa betsapa kenwankin ea jenekubainmisbuki. ⁹Jaska mia yukaibu min ninkaxudan, peki. Jatu katuxunxanwen. Jakia min jatu katuxundiama jaska jatun yununika xanen ibu kushipajaidatun jatu yunukin amakubainxanai dasibi xabakabi bebunkidi jatu chitekin unanmawe, jaska jabun dayaxunxanaibudan”, aka

¹⁰yununika xanen ibu kushipajaida yuka ikaibu Jehován jancha Samuelin ninkatan jatu bamabimakin ¹¹yuikin:

—Jaska yununika xanen ibu kushipajaidatun matu akubainxanai matu yuinun ea ninkakanwen. Matun bakebu kenatan detenamenikabu jatu yunukin jatidi detenamenikabu wakín jatidi jawen caballo tadantiki mapumisbu wakín jatidi ichapa caballoki katsaumbaintidubu jatu wakín januxun jatidi jabun xanen ibu kushipajaida mekenikabu jatu waxun jatu yunupakexankanikiki, ¹²betsabu 1,000 detenamenikabu xanen ibuxunkin yunuti wakinan, betsabu 50 detenamenikabu yunuti jatun xanen ibu bexmas wakinan. Matu man juni ewabudan, jatidi katukin jawen bai anu dayadubu wakín jatidi bai anu bimi

tsekanika wakin jatidi jabun jashi inun kanun inun pia wanikabu wakin jatidi jawen detenameti caballo tadanti dami wanika matu wakubainxankanikiki. ¹³Ja dikabi matun bake chipashbu ichapa jatu dayamakatsi katuxanikiki, eska tibi jau axununbunan. Betsabu xeni ininipa wanikabu wakin inun betsabu jawen bawaxunikabu wakin inun betsabu misi wanikabu wakin jatu dayamakubainxankanikiki. ¹⁴Matun bai pepabu inun matun uva bimi bai pepabudi inun olivo ji bai pepabudi jawen kushipawen matu mebintan jau ibu wanun jawen dayadu jatu inankubainxanikiki. ¹⁵Matun xekiwan betsa betsapa inun matun uva bimi año tibi man tsekaibu 10 tibi man jaya bestichai tibi décima parte mebintan jawen dayadu inun jawen medabewanika xanen ibu bexmasbu jabe tsuabu jatu inankubainxankanikiki. ¹⁶Ja dikabi matun dayadu junibu inun, matun dayadu ainbuaibu inun, matun ina awa pepabu inun, matun asno matu mebinikin ibu watan jau ja dayaxununbun jatu yunukubainxankanikiki. ¹⁷Ja dikabi año tibi matun chaxuwan inun cabra tanaxun 10 tibi man jaya bestichai tibi décima parte bikubainaya matudi man jawen dayadu idiakunkainxanaii. ¹⁸Ja yununika xanen ibu kushipajaida ikis man katukatsi ikaitunan, matu ichakawakubainaya Jehován jau matu medabewanun kaxakin man yuka Jehován matu ana ninkama ixanikiki— jatu wa

¹⁹⁻²⁰Samuelin jatu mesewabia jawen jancha ninkabuma Israelin enabu anibu unanepa xanen ibubun kemakin yuikin:

—Jabiaskabiaken yununika xanen ibu kushipajaida nun jayakatsis ikaii. Dasibi mae betsa betsapa jiwebaunabu keskaidan, yunukin nuku mekekin nukun detenamenikabube tsuabuda nukuki sinataibu nuku maemaxunkubainxanunan— akeakeabu

²¹ninkatan jatun jancha Samuelin Jehová banabimakin yuia ²²kemakin Jehován yuikin:

—Jaska mia yukaiibu keska ninkatan yununika xanen ibu kushipajaida jatu katuxunxanwen— aka jatu anu ana kaxun Israelin enabu Samuelin yunukin yuikin:

—Matun mae tibi anu chintundibainkanwen, jaska man ea yukaxu en matu axunxanaidan— jatu wa

Samuelki Saúl nukunikiaki, na janchadan

9 ¹Jacobun juni bake Benjamínen enabu juni betsa dasibibun bechipaimisbu jawen kena Quis inikiaki. Jawen xenipabu Affahn juni bake betsa Becorat inikiaki. Becoratin juni bake betsa Seror inikiaki. Serorin juni bake betsa Abiel inikiaki. Abielin juni bake betsa Quis inikiaki. ²Quisin juni bake iyua juni ewa jawendua ewapa keyatapa jawen kena Saúl inikiaki. Israelin enabu betsa jawendua keyatapa ja keska tsua jalebisma jatu binu keyua inikiaki.

³Xaba betsatian Quisin asno ichapa ibubis jadakidida bui benushinken jawen bake Saúl yuikin:

—Nukun dayadu jadatuda betsabe kaxun nukun asno benakubauntankanwen— aka ⁴Saúl jawen dayadu betsabe kakin Efraínen enabun maewan mati matipa bai kapukebainkin benakubaini Salisá maewandi kapukediabaini jakia jawen epan asno jawa bechiamana, ana kai Saalim maewandi kapukediabaini jawa bechiamana Benjamínen enabun maiwan pakea anudi bena keyubiakubaina jawen epan asno jania bechiamana ⁵ana kai Sufin enabun maewan anu jikitan jawen dayadu jabetan benakubaunai Saúlun yuikin:

—Chintundikainanwen. En epa jawen asnawen nuibiashina ja binumai nukuwendi nui: “Benuabuki”, ixun, nuku shinanjaidaikiki— aka ⁶jawen dayadun shinantan kemakin yuikin:

—Na maewan anu Diosun jancha yuixunika jiweaki. Jawada yuia imiswen taexun jaki mesekin jawen jancha ninkamisbuki. Jadi kananwen, jatun ja baiwen kaxun nukun asno mapua nun bechitidu nuku yuitidumenkainan— aka

⁷Saúlun kemakin:

—Jaskakenan, uinun kawé. Jakia ¿jawa buxun nun inankuintidumen? Nukun sakuki nun misi beshian ana jayamawen taea nun jawa inankin benimawatimaki— aka ⁸kemakin jawen dayadun Saúl yuikin:

—Plata pei jexe kaduma en kapankanki en jayaki. Jadatu baiwen nun kai jau nuku yuinun na plata pei jexe pishta Diosun jancha yuixunika inanun kawé— aka ⁹(Nukun xenipabu jiweatian Israelin enabun Dios yukakatsi ikin yuikin: “Unanjaida uinun kawé”, abiapaunibun ikis unanjaida jancha betsawen kenakin: “Diosun jancha yuixunikaki”, amisbuki.)

¹⁰Jawen dayadun jancha ninkatan Saúlun yuikin:

—Jaska min shinain peki. Janu kananwen— aka janu Diosun jancha yuixunika jiwea anu bui ¹¹jawen mae mananan anu mapekebainkin chipashbun unpax bi butubidanaibuki nukuxun jatu yukakin:

—¿Nenu jabianua nun jaki nukutidumen, ja unanjaidakidan?— jatu wa ¹²chipashbun kemakin yuikin:

—Jeen. Na jabianua man jaki nukutiduki. Mananan medibi jadixun Dios kenwanmisbu anuxun nami jatu pimai nukun mae anu ma juaki. Menan jawaidabain jaki nukuditankanwen. ¹³Manananxun jatu pimai kadiama jikixun jawaida benatankanwen. Judiamaken nukunabun piama manayumisbuki. Inabu tesenxun jawen xeni menu keyutan jawen kenwanti nami juabu jamaki pitidubumaki. Jakia ja unanjaida juxun ja piti ma jatu Dios kenwankin ma jatu pewaxunken tsuabuda jatu kena bei ichaxun pimisbuki. Jaskawen taea jawaidabainditankanwen, ikis janua man jaki nukuaidan— akeakeabu

¹⁴Janua ana mapekebaini jawen mae jikiti xui ma kemaibun mananan medibi jadixun Dios kenwanmisbu anu kai Samuel jatukidi jui taxnikidani juaya

¹⁵uatian Saúl judiama Jehován bebunkidi Samuel yuikin: ¹⁶“Meshukidi jabia badidi juni betsa Benjamínen enabun maiwan pakeanua janu mianu betsa en yunuxanaii. Israelin enabu en jatu ena wani jau jabun xanen ibu ikunkainxanun ja juni ea katuxunkin ea medibi waxunxanwen. Filisteo nawabun jatu ichakawaibu bika tenekin Israelin enabun ea yukaiibu jatuwen nuikin en ninkaiwen taexun en jatu medabewaya Filisteo nawabu ja junin maemakin ea jatu putamaxunxanikiki”, aka Samuelin ninkashinawen taexun

¹⁷Saúl juai Samuelin uianyan Jehován yuikin: “Ja juni juaikidi en mia jancha washinadan, jaki. Ja juninan, enabu anua xanen ibuxunkin jatu yunukubainxanikiki”, aka

¹⁸mae jikiti xui anu Samuelki kematan Saúlun yukakin:

—¿Min ea yuitidumen, ja juni unanjaida jadakidi jiweamenkainan?— aka

¹⁹kemakin Samuelin Saúl yuikin:

—Unanjaidadan, jabia en eaki. Mananan medibi anuxun Dios kenwanmisbu anu ebe bukanwen, jadixun man ebetan piaidan. Meshukidi penama jawada min ea yukakatsi ikai kemakin en mia yuixanaii. Jaska watan en mia nichinxanaii. ²⁰Jakia ja matun asno man benushina 3 día man benaidan, ana jawen nuiyamawe, ma bechishinabukidan. Ja dikabi, Israelin enabu jabun matu bechipaiaibudan, man matubuki, min miadan— aka

²¹Saúlun kemakin yuikin:

—Israelin enabu xukua betsa Benjamínen enabudan, enabudiki. Nun ichapamaki, eskadabesdan. Ja inun, Benjamínen enabu betsa en epan enabu xukua nun ichapamadiki. ¿Jaskakin min jaskakidi ea yuiái?— aka

²²jawa kemama jatu iyui mati anu mapekekain januxun piti jiwe wanibu anuxun piaibu anu Saúl inun jawen dayadu bichixun 30 junibu namakis xanen ibujaidatun tsauti anu jatu tsaumatan ²³bawadu juni yuikin:

—Ja nami paxkatan tadi aduwe— iwanan —En mia inanshina ikis bewe— aka

²⁴jawaida kishi jidabi bitanxun Saúl bebun tsauanyan Samuelin Saúl yuikin:

—En mia aduxunshina mia bexunxuki. En jatu kena beabubetan min piyunun en mia jawa shinanmabia aduxunshinawen taexun pidiwe— aka jabias xabatian Samuelbetan Saúlun pinikiaki. ²⁵Medibi kenwanti jiwe anua butubidani mae anu jikitan jau janu uxanun jiwe sapa mamaki pewaxuna ²⁶jadi Saúl uxa dakashinaya penama janu uxati pepa anu Saúl dakaken Samuelin kenakin yuikin:

—Bestentan butudikidanwen, en ma mia nichianan— aka Saúl benitan butuaya januxun Saúl inun Samuel bai anu taxnimabaini ²⁷mae kexa anu butukainkin Samuelin Saúl yuikin:

—Jau min dayadu ja dukun bebukainun nichinwen. Jakia mianan, ea manayuwe, eska Diosun ea yuishina en mibe janchaidan— aka jawen dayadu nichian bebukaini ma kaken

**Israelin enabu jatun xanen ibu kushipajaida waxunkin
Diosun Samuel Saúl katumanikiaki, na janchadan**

10 ¹Janua ja dabe niti itan bishtu olivo xeni mata Samuelin bitan Saúl maxu atan jatun beya chibankin tantsu akin yuikin:

—Jehován mia katukin medibi waikiki, Israelin enabu, jawenabukididan, xanen ibuxunkin min jatu yunubainxanunan. Jatu yunukubainkin tsuabuda jatuki sinatakin minabu ichakawakin bika tenemakubaini jatu dapi jiwebaunabu nemakin jatu jenemakin keyukin Israelin enabu min yunukubainxanaii. Eska ikis en mia yui ai keska min jaki nukuakeakekainai en mia shinanmai, jawen unanti tibidan, jaska Jehován mia ma katua min kaidan. ²Ea anua min ma ka, Benjamínen enabu maiwan pakea Selsah anu janu Raquel mai wanibu dapi juni dabeki min nukui kaii. Ja dabetun mia yuikin: “Asna min benakubauntanidan, ma bechishinabuki. Jakia min epan asnakidi ana shinanma matu dabekidi besti shinanajaidaikiki, ‘¿En bake jaskatan jatu bechipa?’”, iwanan, “mia shinainkiki”, akin mia jaska wabu ³ninkabaini ana unudi bai tanabaini kai Tabor anu ji ewapa kushipa jawen kena encina anu ³juniki min jatuki nukui kaii. Jabun Dios kenwain Betel anu mapekei bei ja dukun bebukidankin ³cabra bake iabainun janua betsan ³misi ewapa tsumaxun benun januxun betsandi chaxuwan bichi sakuki vino mata iabidanai min jatuki nukuaya ⁴jabun mia yukakin: “¿Jaskadamen?” mia watan mia misi dabe inanxankanikiki. Bixanwen. ⁵Ana kakunkaini mae betsa Jehován Guibeá janu Filisteo nawa detenamenikabun kexea jiweabu anu min ma kemai jikiken medibi mananan anua Diosun jancha yuixunikabu nishi paewen paeen keska benimai butubidanai bei Dioskidi janchai bekubidanaibun jatu bebun arpa inun shasha ati inun tepedewe inu mimawati betsa mawakubidanaibuki min jatuki nukuxanaii. ⁶Jatuki min nukuken Jehován yushinin mia kushipawaya Diosun jancha yuixunikabu paeen keska jatube benimai jabu betsa keskai min juni betsajaida ixanaii. ⁷Jaska mia wa kaimaxun min jatun jiwea medabewakatsi ikai, pepakin jatu axunkubainxanwen, Diosun mia medabewakubainxanikikidan. ⁸Min jaskakainshina bebunkidi Guilgal anu kaxanwen, jadi ana en miki nukui kaxanaii. Jadixun mibetan inabu xeni menukin keyutan jawen nami Dios daewati inankuinkin nun daewaxanaii. Jadixun ⁷xaba ea manaxanwen, en kai miki nukuxanidan, min jaska wakubainxanai jadixun xabakabi en mia ana yui kaxanidan— aka

⁹—Ma en kaii— abaini Saúl kaya Diosun Saúl jawaida shinan betsa wamaxun jaska jawen unanti Samuelin Saúl yuixu Diosun

dasibi uinmakubidanxu ¹⁰janua jawen dayadube Saúl Guibeá ma kemai kai Diosun jancha yuixunikabu benimabidani Saúlki nukuabu Diosun yushinin Saúl betsa wakin kushipa wa nishi paewen paean keska benimakin jatubetan Saúlun Dios kenwankubainaya ¹¹Saúl uinkubidanmisbun jatube Saúl ikai uin jabu yuka ikin yuikin: “¿Quisin bake jaskai ikimenkain? ¿Saúldan, jabiadi Diosun jancha yuixunikadi ikimenkain?” iake iakeaibun

¹²juni betsan ana jancha betsawen yuikin: “¿Jabun epadan, tsuamen, jatun jatu kushipa waidan?” januxun shinankubidanibu yuikin: “Saúldan, jabiadi jawenabu Diosun jancha yuixunikadi ikimenkain”, iwanan, yuiakeakepaunibukiaki.

¹³Diosun jancha yuixunikabubetan Dios kenwankin keyutan jawen epan jiwe anu Saúl kai jikia ¹⁴jawen kukan Saúl inun jawen dayadu yukakin:

—¿Man jani katanshinamen?— aka kemakin Saúlun yuikin:

—Asna benakubauni nun jawa bechiamo kawantanshinaki. Jakia Samuelki nun nukutanshinaki— aka

¹⁵jawen kukan ana yukakin:

—Jawa Samuelin matu yuishinamenkain, menan ea yuidikanwen— jatu wa

¹⁶kemakin Saúlun yuikin:

—“Matun asno ma bechishinabuki”, iwanan, besti nuku yuishinaki— aka jakia Israelin enabu yunuxanun jaska Samuelin yuishinakidi jawa yuiama ishinken ¹⁷januxun jau Jehová kenwankin duawai benunbun Mispá anuxun Israelin enabu Samuelin jatu kena ¹⁸bei ichabu jatu yuikin:

—Eska Israelin mekenika Dios Jehován ea yuishina matu yuinun ea ninkakanwen. “Matun xenipabu Israelin enabu taxnimakin en jatu iweniki, Egipto anuadan. Egipto nawabun jatu ana achipaiaya en kushipawen en jatu yamawaniki. Bekubidanaibu nawabu xanen ibu tibibun jatu ichakawapananbun en jatu maemaxunkubidaniki”, ea washianki. ¹⁹Jakia jabun matu chakabuwakin bika tenemaibu matun mekenika Diosun matu medabewakin matu nemaxunbiakubidana ja besti chitikatsi ikama natian man ja danankin yununika xanen ibu kushipajaida man ea yukaimawen taea na jabiatian Jehová bebun Jacobun juni bake tibitun enabu xukuabu tibi ichatan janua jawenabu tibi anua Jehová bebun jau bebidan bebidanunbunwen— jatu wa

²⁰Samuel jatu yunuaya Jacobun juni bake tibitun enabu bebidan bebidanaibu jawen unanti betsa watan jaya inun jayama watan Benjamínen enabu anua Samuel jawen jatu katutan ²¹ana jatu yunuaya Benjamínen enabu xukuabu tibi paxkatan jawenabu nantakea tibidi

bebidan bebidandiaibun jawen unanti watan Matrín enabu nantakea Samuelin katuxun ana jatu yunuaya Matrín enabu jiwe ibu bestibu tibi bebidan bebidandiaibun jawen unanti ana jabiasyadi watan Samuelin Quis katuxun jawen juni bake kena tibi jau yuinun Samuelin Quis yunua jawen baken kena tibi Quisin yuikubainaya jabiatandi jawen unanti Samuelin ana watan Saúlun kena taxniken Saúl benabiabaunabu jawa bechiabumawen taexun ²² ana Jehová yukakin: “Saúldan, ¿jani nun jaki nukutidumen?” akabu jatu kemakin Jehován jatu yuikin: “Ma juaki. Ja mabu mania naman anu ma juneaki”, jatu wa, ²³ kushikain janu junea anu kaxun Saúl taxnimatan iwekin Israelin enabu ichabu bebun nichianbu Saúlun keyatapa Israelin enabun tsuan binuama jawen punti anu kesubainbainabu dasibibun uiainbun ²⁴ Samuelin jatu dasibi yuikin:

—Matun yununika xanen ibu kushipajaida ikunkainxanun na juni Jehován ma katuxu man uiain. Israelin enabu tsua jaska keska jayamaki— jatu wa

kemakin jui kushipawen dasibibun yuikin:

—Badi ichapa jau jiwepakexanunwen, nukun xanen ibujaidadan— akin keyuaibun

²⁵ jawada xanen ibujaidatun akubaintidu inun jawada atiduma Samuelin jatu dasibi yusinkin tapinmatan jabias jancha dasibi unaki kenexun Jehováki nukuti tadi jiwe anu adutan dasibi jatun jiwe anu jau bununbun Samuelin jatu nichian buaibun ²⁶ ja dikabi jawen jiwe Guibeá anu Saúl kadiai juni detenamenika betsa betsapa jabe jau bununbun Saúl bechipaimakin Jehován jatun shinan Jehován pepa wa Saúl chibanbainabun ²⁷ jakia jancha chakabukin yuanmisbun yuikin: “¿Jatun nuku mekekin yunuxanaimenkain, ja juninan?” akeakekin danankin jawen kenwanti inankuinti buxuanbuma unanbiakin Saúlun jawa yuiama inikiaki.

Amón nawabu Saúlun jatu maemanikiaki, na janchadan

11 ¹ Amón nawa xanen ibujaida Nahasun Israelin mae betsa detetan jatu mebinun, iwanan, jawen detenamenikabu jatu pewatan maewan Jabés Galaad anu jatu iwexun jatu kexemabaunawen taexun Jabés anua anibu unanepabu kaxun Nahas yuikin:

—Nukube yubakawe, min dayadu nun ikunkainxanaidan— akabu

² Amón nawa xanen ibu Nahasun jatu kemakin yuikin:

—Matube yubakakatsi ikidan, ja dukun matun bedu yusiudia matu tseka keyu bestitan janu en matube yubakatiduki. Israelin enabu dasibi en jatu ichakawa jaska mapuabu jatuki kaxeabu dakeaibu en uinkatsis ikaii— jatu wa

³ jaska jatu wa ninkatan Jabés anua anibu unanepabun kemadiakin yuikin:

—7 día nuku manayuwe. Min nuku manaya jau nuku medabewai benunbun Israelin enabu maiwan pakea tibi anu kaxun min jancha nun jatu ninkamayui kaidan. Nuku medabewai beabumaken jaska min nuku yuixu keska nun mia nemama min nuku ichakawatiduki— akabu jatun jancha Nahasun ninkatan:

—Peki— jatu wa

⁴mae Guibeá janu Saúl jiwea anu jabun kaka bui jikixun janu jiweabu jatu banabimakin keyubaunabu, ninka keyutan dasibi datei kaxa chakayamaibun ⁵Saúl jawen bai anu dayatani jawen ina awa dabe ji tekishkuyan dabeyabe jui yuka ikin:

—¿Nukunabu jaskaimenkain? ¿Jaskai kaxa chakayamakanimenkain?— jatu wa

Jabés anua junibu juxun jatu kaka yuikanxu jabias kaka Saúl banabimabu ⁶Saúlun ninkatanaya jabiatandi Diosun yushinin kushipa wakín Saúl achiaya Saúl sinata paepakaunkin ⁷januxun machatu chaipa kenujaidawen ina awa dabe tesenxun ja dabe mexte mexte atan Israelin enabu maiwan pakea tibi anu nami mexte tibi jau jatu inankin eska jatu yuiakeakebauntanunbun jatu yunua buxun jatu yuikin: “Saúl inun Samuelbe man ichai beabuma tsuabunda man jatu chíbanma na ina awa mexte nun matu bexunxu keska wakín Saúlun matun ina awa tenankin akawakin matu kupixanikiki”, akin jawen jancha bunikabun jatu yuikubaunabu ninkai datejaidai juni bestichai keskai dasibi janus bei Saúl inun Samuelki ichai keyuabu ⁸ninkatan beabu Bézec anuxun Saúlun jatu tanakin Israelin enabu 300,000 junibu tanatan Israelin bake Judán enabu tadi jawenabu tanakin 30,000 junibu tanadiaxun ⁹Jabés anuabun kaka bei chani beshianbu jatu yuikin:

—Meshukidi badi manananbitian nun matu medabewai kaxanaii. Buxun na jabias kaka nukunabu Jabés anua jatu yuidi bukanwen— jatu wa bui jikixun Jabés anu jiweabu jabias jancha jatu banabimabu ninkatan benimajaidatan ¹⁰januxun Amón nawa xanen ibu Nahas anu buxun padankin yuikin:

—Meshukidi mia anu nun juxanaii. Nuku achitan jaska min nuku wakatsi ikai keska nuku axanwen— akabu ninkatan Nahasun jatu manaya

¹¹uxashinkin Saúlun jawen detenamenikabu jatu paxkakin 3 xuku watan june jatu iyukin meshu medan jawa janchai banama ma pena kemaya Amón nawabu bestendiabuma anu jatun tadi jiwe puntebaunabu anu jikibainkin jatu detetiyaxun jatu detekubainkin badi manananbi jatu keyuabu Amón nawabu jatidi paxai kushibaini besti dasiabu jawa juni dabe nia tsuan bechiamaken ¹²chipu jawenabu betsa betsapabun Samuel yuikin:

—“Saúl nukun xanen ibujaida kushipa itidumaki”, jabu ikimabudan, ana jaska jakidi shinan chakatidubumaki. Tsuabuda jakidi jancha

chakabuimabumenkain, nuku yunukanwen, nun jatu detekin keyuaidan— iake iakebiaibun

¹³shinan chakai janchaibu Saúlun jatu nemakin:

—Israelin enabu Jehován ma nuku medabewaxunwen taea ikis tsua ana mawatidubumaki— ikaya

¹⁴jawaida Samuelin dasibi jatu yuikin:

—Nenua Guilgal anu buxun Saúl nukun xanen ibu kushipajaida dasibi jatu unanmakin taewadinun bukanwen— jatu wa,

¹⁵ninkatan dasibi Guilgal anu bui mapekei jikixun Jehováki nukuti tadi jiwe bebunxun dasibibun yuikin: “Saúl nukun xanen ibu kushipajaidaki”, atan januxun inabu tesenxun jawen nami bawaxun pi besi Saúl inun Israelin enabu dasibi Jehová daewai jabe jaibunamei benimajaidanibukiaki.

**Saúlun jau jatu yunukubainxanun xanen ibu kushipa
wakin Samuelin Saúl yununikiaki, na janchadan**

12 ¹Jaska wai menei keyutan Israelin enabu dasibi Samuelin jatu yuikin:

—Dasibi man ea yukai ninkaimaxun matu medabewakin xanen ibujaida kushipa en ma matu katuxunshinaki, na man uiainan. ²Matu jatun yunukubainxanun yununika xanen ibu kushipajaida man ma jayaki. Jamen eadan, en ma matu anibuxuanki, en bu siun siunpaidan. Jakia en bakebu ma juni ewabu matube jiwekanikiki. Bedunantun en matu yunutiani na jabiatian matu bebun nixun en ma matu jeneaii.

³Na jabiatian en nenuki. Jaskada en matu akubidanshinamenkain, ea yuikanwen. Tsuan ina awa kasmai asno en biainmamenkain, bika tenemakin tsua en ichakawaimamenkain, jawa chakabu jau jatu unanyamanun june jatun pei en biainmamenkain, Jehová bebun inun matun xanen ibujaida Jehován katuima bebun en tsuada jaska waimadan, xabakabi ea yuikanwen, man juni betsa en jaska waima en dibiadan, jawada pepawen en matu pakaidan— jatu waya

⁴jabun kemakin yuikin:

—Bika tenemakin ichakawakin min shinan betsa wanun, iwanan, pei mia inainbu bikubidankin min nuku jaska waismaki— akabu

⁵Samuelin ana jatu yuikin:

—Jaskakenan, ekidi chakabu man bechiamadan, Jehová inun matun yununika xanen ibujaida Jehován katuimatun jabias unankanikiki, chakabuwakin en jawa kaneismadan— jatu wa jabun kemakin:

—Jaa, chanimaki— akeakeaibun

⁶Samuelin ana jatu yuikin:

—Moisés inun Aarón Jehován jatu kushipa watan jatu medabewakin Egipto anua Jehován matun xenipabu jatu taxnimabidaniki. ⁷Jaskawen

taexun matun shinan pewakin ea ninkajaidakubainkanwen. Jehován nuku ninkaya jaska wakin matun xenipabu inun matudi Jehován duawakubidanmiskidi yuikin en matu xabakabi waxunai ea ninkakanwen.

⁸ Jacob inun jawen bakebu inun jawen bababu Egipto anu jikiabu chipu jatu ichakawakubainaibun jau jatu medabewanun matun xenipabu kaxakin yukaiabu Jehován Moisés inun Aarón jatu anu yununikiaki. Egipto anua ja dabetun matun xenipabu iwekubidankin na mai anu matun xenipabu jatu jiwemanibuki. ⁹ Jakia Jehová jatun mekenika Dios matun xenipabun jakimanibuwen taexun jatu kupikin Hasor anu Jabín xanen ibun detenamenikabu xanen ibu Sísara Jehován yunukin, Filisteo nawabudi yunukin, Moab nawa xanen ibubudi yunukubainaya matun xenipabuki sinatakin jatu detekubainaibun ¹⁰ jakia chipu juinti nishmaxun jaska ma kaneshina Jehová yuikin: “Mia danankin mia jenebain yushibu Baal inun Astarté kenwankubidani nun chakabujaidaimaki. Nukuki sinataibu nuku nemaxunwen, jau nuku ana yunuyamanunbunan. Min nuku jaska waxuna mia besti duawakatsis ikin nun mia yubaii”, akabu

¹¹ Man unanuma jiwekatsis ikaiwen taexun Jehován matu ninkatan matuki sinatakin matu ichakawaiabu jau jabun matu nemaxunkubainunbun Gedeón Jerubaal inun, Barac inun, Jefté inun, ea Samuel Jehován nuku yunuakeakekubainshinaki. ¹² Jakia matun mekenika Dios Jehová matun xanen ibu kayabibiaken Amón nawabu xanen ibu Nahasun matu detenun ika jawen detenamemisbu matu dapi iweaya uin jatuwen datekin jau jatun nuku yunukubainxanun yununika xanen ibu kushipajaida nuku katuxunwen, iwanan, man ea yukaimaki. ¹³ Jaska bechipaikin matun yununika xanen ibu man katuimadan, na ma nia. Jaska man ewen taexun man yuka Jehován ma matun xanen ibu katuxun yunushinaki. ¹⁴ Natian man ja chibantidubuki. Matu inun matun xanen ibu Saúlun Jehová kenwankin, jawen jui ninkakin, jawen yunuti inun jawen nemati jancha dananma jaska matun mekenika Dios Jehován shinain keska chibain unanuma matun yununika xanen ibube pe man jiwekubaintidubuki. ¹⁵ Jakia ninkabiakin jawen yunuti jancha inun jawen nemati jancha man danankin man chibanmadan, matu inun matun xanen ibujaida Jehován matu kupixanikiki, matun xenipabu kupini keska wakinan.

¹⁶ Eskatian jawen dateti dami ewapajaida Jehován matu uinmaikiki. Jabianu tukuama mapuxun uinyukanwen. ¹⁷ Ikis xekiwan trigo tsekamisbutian ui ismaki. ¿Chanimamen? Jakia na jabiatian en Jehová yukaiwen taexun uiyabi kana tun imakin Jehován ui yunuikiki, ikisdan. Xanen ibu kushipa betsa ea yukai man chakabujaidaimaki. Natian man tapinkin unantidubuki, Jehován matu uinmayadan— jatu watan

¹⁸ Samuelin Jehová yuka jawaida uiyabi kanatun imabainbainaya Jehován ui inun kana tun imabainbainaiwen taea Jehováki inun Samuelki dasibi datejaidakin ¹⁹ dasibibun Samuel yuikin:

—Chakabu jayajaidabia shinan chakakin ana nukun chakabu matsankin jamamaki nun yununika xanen ibu kushipajaida yuka ikima ja shinanma jau nun mawayamanun min Xanen Ibu Jehová ea akin nuku yukaxunwen, nun min tsumabudan— akeakeabu

²⁰Samuelin kemakin ana jatu yuikin:

—Dateyamakubainkanwen. Chanimaki. Man chakabujaidaimaki. Jakia ikis Jehová jeneama, matun shinan dasibiwen ja besti kenwankin ikunwankubainxankanwen. ²¹Ana yushibu dami jawen padananainbu jiwea jayama chibankin kenwanyamakubainxankanwen. Jiwea jayabumawen taexun jatun matu mekekin medabewatidubumaki. ²²Jehován matu jawenabu waniwen taexun jawen kena pepawen shinan betsa wama matu jenebainamaki. ²³“Jehová en matu ana yukaxunamaki”, iki ea en chakabukatsi ikamaki. Jehová matu yukaxuni en jenekatsi ikamadiki. Jaskawen taexun bebunkidi pe jiwekainkin man kaneama ixanunbun en matu yusinkubidanaii. ²⁴Matuwen taexun jaska Jehován akubidanmis shinanjaidakubainkin datekin chanima kayabi Jehová besti kenwankubainxankanwen, shinan betsa wamadan. ²⁵Jakia Jehová jenekin man ana chakabuwakin taewaya matu inun matun xanen ibu bena kupikin Jehován matu matsukin akawaxanikiki— anikiaki.

Filisteo nawabube Israelin enabu ana detenamenibukiaki, na janchadan

13 ¹Saúl juni ewakainkin Israelin enabu yunukin taewai xanen ibuima año ichapa kadiama ²detenamenika jau ikubainxanunbun Israelin enabu 3,000 juni detenamenikabu katuken Betel manan mati matipa anu mae betsa Micmás anu 2,000 detenamenikabu jabe bashikuabu janua 1,000 detenamenikabu jawen juni bake iyua Jonatánbe jawen epa Saúlun yunua Benjamínen enabun maiwan pakea Guibeá anu jadi jatu binukin kexemai kaken janua jatidi yudabu texeabu jau jatun jiwetan bununbun Saúlun jatu yunua buabun ³Filisteo nawa detenamenikabu Guibeá anu kexeabu Jonatánen jawen detenamenikabubetan jatu detekin Guibeá anua jatu nichinkin keyua jatu jaska wa jatun maewan anuxun Filisteo nawa xanen ibubun ninkatan unainbun januxun Hebreo nawabun jau ninka keyubaununbun Israelin enabu maiwan pakea tibi anuxun jau chaxuwan maxun chan chan akubaununbun Saúlun jatu yunua

⁴jatu banabimabaunkin:

—Filisteo nawa detenamenikabu Saúlun jatu detekin keyushinawen taea Filisteo nawa dasibibu Israelin enabuki sinatajaidaibun Guilgal anu dasibibu Saúl anu ma ichakanikiki— jatu wabu ma ninkakin keyuabun

⁵Filisteo nawabu Israelin enabube jatubedi detenamedianun ixun jawenabu 30,000 detenamenikabu caballo tadantiki mapuabu inun, 6,000

detenamenikabu caballoki katsaumeabu inun, detenamenikabu main bunikabu ianenwan kexa anu mashi keska tsuan jati jatu tanatiduma jatu yunukin Filisteo nawa xanen ibubun jatu ichawabu jati jayabu Micmás anu mapekebaini jikixun mae betsa badi juaikidi Bet-avén anuxun jatun tadi jiwe puntebaunabun

⁶Israelin enabun jatu uian mesejaida dakaken uin datei paxai junenun ika mishki tanpe anu inun, mai kini xantu anu inun, maxax mananan inun, mai xantu kedu anu inun, chacha unpax anu junei iduabun, ⁷jatidi ichapa paxai Jene Jordán pukebaini bui maiwan pakea Gad inun maiwan pakea betsa Galaad anu iduabun jakia Guilgal anu Saúl bashikua jawen detenamenikabu jabe bashikua datejaidai saki saki iki keyuaibun ⁸jaska Samuelin yubakin janu yuishina 7 día Saúlun manabia jakia Samuel judiamaken junibu bestibu tibi inun bui taewaibun ⁹januxun Saúlun yunukin jatu yuikin:

—Inabu ea bexundikanwen. Jawen xeni menu keyuxun jawen daewati nami nun pinunbunan— jatu wa bexuanbu tesenxun jawen xeni dashpexun inanbu Saúlun ibubis jawen xeni menu ¹⁰keyuaya Samuel jui jikiaya ikin jaki nukui kaxun Saúlun pe jancha wabia ¹¹Samuelin jawaida yuikin:

—¿Jaskakin min jaska waxumen?— aka kemakin Saúlun yuikin:

—Juni bestibu tibi inun bui taewaibun en uian jaska min ea yubakin yuishina ma binuaya min judiama Micmás anu Filisteo nawabu midima ichai keyuaibun ¹²Jehová ea akin medabe en yukadiama nenu Guilgal anuxun ea dukun Filisteo nawabun ea detetidubu shinankin jani jaskatima ibubis ina jawen xeni Jehová en menukin keyuxunxuki— aka ¹³Samuelin Saúl kemakin:

—Na jaska min axudan, min atimapajaidaxuki. Jaska Jehován mia yunuima min kaneama ixudan, min Israelin enabu xanen ibu niti ikama ikunkainkeanaii. ¹⁴Jakia min xanen ibui taebiamaken minabudi ikubainama ixanikiki. Jaskawen taexun juni betsa pepa jaska bechipaii keska axuntidu Jehován ana katuxanikiki, Israelin enabu xanen ibu betsa mistukinan— abaini

¹⁵Janida kai Guilgal anua Samuel kainkaini kaya, detenamekatsi pewatan detenamenikabun Saúl chibain Guilgal anua kainbaini bui Benjamín enabun maewan Guibeá anu jikiabun januxun jawen detenamenikabu jabe bekin chibanbu Saúlun jatu tanabaunkin 600 junibu uianyan ¹⁶Saúl inun jawen juni bake iyua Jonatán inun jatube beabu Guibeá anu niti ixun manayuaibun Filisteo nawabu Micmás anu jatun tadi jiwe puntebauna maniabun ¹⁷jakia 3 detenamenika xuku jaya jabu tibi paxkabaini betsa maiwan pakea Sual anu mae betsa Ofrákidi butanunbun ¹⁸janua xuku betsa Bet-horónkidi butanunbun janua xuku

betsa janu tsua jiweabuma anu kexa Seboím paxku napanpakidi bui januxun uinbauntidubu anu mananan jikiabun,

¹⁹machatu chaipa kenujaida inun jashi Israelin enabu, Hebreobudan, jau detenameti dami wayamanunbun Filisteo nawabun jatu nemamisbuwen taea Israelin enabu maiwan pakea jidabi anu acero mane kenuti mabu wanika tsua jayabumaken, ²⁰jatun kenu mabu dayati shadabu kenunun, iwanan, Filisteo nawabun januxun acero mabu wamis inun januxun kenumis anu jatun dayati mabu jau bununbunwen, ²¹mai pukinti betsa betsapa kenuxun pei jexe dabe jatu yuka pakamamisbu inun, due inun chachiti kenukin pei jexe bestichai jatu yukakin pakamamis ipaunibukiaki. ²²Jaskawen taea jabun Saúl inun jawen bake Jonatán chibanbu jabu jawa deteti kenu jayabumaken Saúl inun Jonatán besti machatu chaipa kenujaida inun jashi jayabuken ²³Filisteo nawabu kushibain Micmás anu mati dabe namakis napaku anu janu bai kati anu tsuan jatu nemama jikiabun

Mentsisipakain Jonatánen Filisteo nawabu jatu detekin maemanikiaki, na janchadan

14 ¹xaba betsatian Saúlun juni bake Jonatánen jawen medabewanika yuikin:

—Ukedi paxku pukebain Filisteo nawabu detenamenikabu xuku betsa detenun kawé— aka jaska kainkin jawen epa Saúl banabimama ²mati manan tenanmanxun januxun xekiwan trigo katamisbu anu ji betsa jawen kena granado naman manixun 600 junibubetan Saúlun manaya ³Jehová yukanun ika Diosbe jawenabu janchaxunikatun tadi jawen kena efod Ahíasin bexuan inikiaki. Ahíasin epadan, Ahitub inikiaki, Icabodun betsadan. Janua Icabodun epadan, Finees inikiaki. Fineesin epa Elí inikiaki. Siló anuxun jawenabu Jehovábe jatu janchaxunikadi ikunkainikiaki, Elídan.

Jonatán taxnikainkin tsua yuiama ka tsuan jawa unanmaken ⁴mati kubudu keyatapa dabe jawen kena Bosés inun Sene ja dabe namakis bai anu Filisteo nawabu detenamenikabu maniabu anu kemanun ika ka ⁵mishki mati keyatapa betsa Micmás bebun nortekidi nia inun betsa Guibeá bebun surkidi nidiaken ⁶januxun jawen medabewanika Jonatánen yuikin:

—Filisteo nawa detenamenikabu jawa nukun Dios unanbuma anu jatuki kemai ukedi kexa betsaudi kawanawanwen, Jehován nukuwen taexun nuku medabewatidumenkainan. Jehován jawen maemati kushipadan, jawa bikamaki. Juni ichapawen kasmai juni eskadabeswen Jehován nuku jatu maemamatiduki— aka

⁷kemakin jawen tsumapan yuikin:

—Jaskakenan, jaska min shinain keska akubainwen. Jawada min shinain en mia chibankin axunkubaintiduki— aka

⁸jaska yuia januxun Jonatánen kemakin yuikin:

—Uian, ukedi janu mapuabu anu kapukenanwen, jau shinanxun jabun nuku uinunbunan. ⁹Jabun nuku uintan yuikin: “Manayukanwen, matu anu nun butuaidan”, nuku akabu nun jatu manaii, jatu anu mapekeamadan. ¹⁰Jakia jabun ana nuku yuikin: “Nuku anu mapekekanwen”, nuku akaibuwen taexun Jehován nuku medabewaya nun jatu maematidu unantan jatu detenun ika samama nun jatu anu mapekekaintiduki— aka

¹¹jau shinanxun jatu uinunbun juneabu anua taxnibainaibu Filisteo nawabun jatu bechitan yuikin: “Uinkanwen. Janu ma juneshinabu mishki tanpe anua Hebreo nawabu ma taxnibidankanikiki”, iwanan ¹²jui kushipawen Jonatán inun jawen tsuma sai akin yuikin:

—Detenameti matu yusinun nuku anu mapekekanwen— ikaibun jawen tsuma Jonatánen yuikin:

—Jhován nuku medabewakin Israelin enabu jatu detexunkin maemaikiki. Echun jukin ea chibanbidanwen— aka

¹³jani min mapeketiduma anu mapekei betankubaini Jonatán mapekeaya jawen tsumapandi chibandiabaini jabe mapeketan Jonatánen Filisteo nawabu detekin di atanai jawen tsumapan jatun namekin tenankubaunkin ¹⁴jabu dukun tenan taewakin janu kexeabu anu mae jatiuma anuxun Jonatán inun jawen tsumapan 20 junibu jawaida jatu detekin tenanbu ¹⁵jatu jaska wabaunaibu Filisteo nawabun unantan detenamenikabu jatun tadi jiwe puntebaunabu anu inun detenamenikabu xukuakeakea nanta kexebaunabu datebaunaibun januxun Jehován mai pacha sakumakin jawa shinantimawakin jatun shinan jatu benua Filisteo nawabu dasibi datejaidai bedukubaunaibun

¹⁶Benjamínen enabun maewan Guibeá anuxun Saúlun jatu yunua jabu mapuxun uinbaunaibun Filisteo nawabu jadakidi katima datei kushibaunaibu uinkin Saúl yuiabu ¹⁷jaska ninkatan jawen detenamenikabu jabe ichabu Saúlun jatu yuikin:

—Tsua nukunabu nenu jayamamenkain, jatu benabaulkanwen— jatu wa tanakin uinbaunkin Jonatán inun jawen tsuma jayama uintan Saúl yuiabu, ¹⁸Israelin enabu detenamenikabu anu Diosbe jatu janchaxunikan tadi efod ma beshian Ahías Saúlun yunukin yuikin:

—Diosbe yubakani tadi efod nenu bewe— aka

¹⁹Diosbe jatu janchaxunikabe Saúl janchaya Filisteo nawabu jatun tadi jiwe puntebaunabu anua datei jaskatima bis bis iki bedukua itimaskajaidakubaunaibu uinkin ninkatan Saúlun Ahías ana yuikin:

—Jaskamaki. Efod ana beyamawe— atan

²⁰jawen detenamenikabu Saúlun jatu ichawatan: “Jatu detenun bukanwen”, iwanan, jatu iyuaya jawa shinan betsawen jaskatima janubi Filisteo nawabu detenamebaunaibun ²¹ja dikabi uatian Hebreo nawabu Filisteo nawabube

dasia jiwenibu jabu dikabi beshianbu jabuan Filisteo nawabu jenebaun ma jatunabu Israelin enabu medabewakin Saúl inun Jonatánbe dasitan Filisteo nawabu jatu detekin jatu medabewanibukiaki. ²²Jatu deteabu Efraínen enabu maewan mati matipakidi Filisteo nawabu jadi paxaibu ninkatan jatu detenun ika taxnibidankin detekubainkin jatu chibanbainkin ²³Bet-avén anuxun jatu dete keyutan chintuntanibukiaki. Jaska wakín Jehován Israelin enabu medabewakin Filisteo nawabu jatu putamanikiaki.

**Jau jawa piyamayununbun jawen detenamenikabu
Saúlun jatu nemanikiaki, na janchadan**

²⁴Saúlun Israelin enabu jatu yubakin nemakin yuikin: “Badi kadiama eki sinataibu nun jatu dete keyudiana Filisteo nawabu chibanbainkin detekubainkin tsuan taska piyamayuxankanwen. Tsuanda ea ninkama bunikin man piadan, chakabujaidaxanikiki”, jaska jatu wabidanawen taea ja xabatian Israelin enabun jawa piti betsa metsabumajaidaken ma jin iki punu nukai babubiaxun ²⁵⁻²⁶Filisteo nawabu chibain ji xukua anu jikibaun janu buna jawen bata ji anua chakajaidai unpx keska jabai mai anu pantu tsaua Israelin enabu detenamenikabun bechibiatan Saúlun jatu nemakin yupuawen taea datekin tsuan meamajaidaken ²⁷jakia jawen epan nemati jancha Jonatánen ninkama ikawen taexun jawen jashi debuwen buna bata pantu tsaua pukutan jawaida mebaini jawen shinan chankain benimakaini kaya ²⁸jawen detenamenika betsan uintan yuikin:

—Min epan nuku yubakin yuikin: “Tsuanda na jabiatian piti betsa piadan, Jehován jau chakabujaida wanunwen”, akin nuku yuibidanawen taea jaska ninkabidana nukunabube nun ma punu nukajaidabuki— aka ²⁹Jonatánen kemakin:

—En epan jatu nemakin nukunabu ichakawakin jatu yubawen taea man ma babuaki. Buna bata eskadabes mekin en pia en yuda en ma ana kushipaxuki. Uinwen. ³⁰Filisteo nawabun piti nun jatu putama buaibun ja nukunabun ja piti pikubaini jawen kushipatan nukunabun Filisteo nawa midima jatu detekin badis ma nun jatu dete keyuxu ikeanaai— aka

³¹Israelin enabu punu nuka jin ibiakubainkin ja xabatian Micmás anua Filisteo nawabu detekin chibankubainkin jatu keyudiana Aialón anu jatu jenetan chintunbidankin ³²atimas Filisteo nawabun ma jatun inabu jenebainabu chaxuwan inun, ina awa inun, jatun ina awa bake bitan betsa tesenxun maiki mexte mexte axun jawen nami paxa jimiyabi piaibun ³³jakia jatidi buxun Saúl yuikin:

—Jhován jancha danankin chakabuwakin nami paxa jimiyabi pikanikiki— akabu

Saúlun kemakin jatu yuikin:

—Matunmebi man chiban pewaismaki, kanekin chakabuwaitan. Mishki ewapajaida tadanbidan nenu ea bexunkanwen. ³⁴Jaska watanxun jatun

ina awa inun jatun chaxuwan bestibu tibitun jau nenu benunbun jatun yuikubauntankanwen. Nenu bexun tesenxun jawen jimi jabai keyuaya mexte mexte axun bawaxun pitidubuki, nami paxa jimiyabi pi chakabukin Jehová ana sinatamamadan— jatun wa jatun yuibaunabu jabias meshuki bestibu tibitun ibubis jatun ina awa bexun tesenxun jimi jabawakin keyutan bawaxun pikin keyuabun ³⁵januxun ja dukun tates taewabainkin Saúlun ibubis jawen kenwanti chi tapu Jehová axunkin taewanikiaki.

³⁶Jaska jatun pewatan Saúlun jatun yuikin:

—Ikis na meshu medan butubain Filisteo nawabu ana jatun bedutan detekubainkin penadiama tsua betsa taska texe wakin jiwemayamaxankanwen— jatun wa

dasibibun yuikin:

—Jaska min shinain keska akubainwen— akeakeabu jakia jawenabu Diosbe jatun janchaxunika Ahíasin Saúl yuikin:

—Jawada nun akatsis ikai adiaama Jehová yukakin taewananwen— aka ³⁷jawen jancha ninkatan Saúlun Dios yukakin:

—¿Ana Filisteo nawabu jatun chibankubainpa? ¿Israelin enabu min jatun nuku yunukin maemamatidumen?— aka

jabias meshu medan Jehová jawa kemama pes dakaken ³⁸jaskakin Jehován jawa yuiama tapinkatsi ikin Saúlun jawenabu yuikin:

—Detenamenika xanen ibu dasibibube nenu bekanwan, tsuan na jabiati chakabuwakin man kanexumenkain, nun tapinunan. ³⁹Israelin enabu mekenika Jehován ea ninkaya en matu yubaii, tsuanda Jehová sinatamakin kanebidanamenkain, jau mawanunwen. En bake Jonatánen chakabuwakin kanebidanadan, jabiadi jau mawanunwen— ikaya xanen ibubu detenamenikabun jawa yuiabumaken ⁴⁰Israelin enabu dasibi Saúlun ana jatun yuikin:

—Paxkatan mapu bukunankanwen. Ukedi matu dasibi ikanwen, nekedi en bake Jonatán inun ea nun niaidan— jatun wa

dasibibun kemakin yuikin:

—Jaska min nuku akatsis ikai keska awe— akabu

⁴¹jancha kushipawen Saúlun Jehová yuikin:

—Israelin mekenika Dios Jehováan, min dayadun mia yukabia ¿jaskakin min ea jawa kemamamen? En kaneamenkain, en bake Jonatánen kaneamenkain, jawen unanti Urim jau jaki taxninunwen. Jakia Israelin enabu minabudan, jabun kaneamenkain, jawen unanti Tumim jau janu taxninunwen— akaya

Jonatán inun Saúl anu unanti watan Urim bia kaianyan jawen jatun unanti waya Israelin enabu kaneabuma jatuki pe kaianyan

⁴²jaskaya Saúlun ana jatun yunukin:

—En bake Jonatánmenkain, en eamenkain, nuku unankin jawen unanti ana nuku anu kainmawe— aka

unanti wati bia Jonatán jatu unanmai jaki taxniaya ⁴³jaskaya Saúlun Jonatán yunukin:

—Jawada min kanebidana xabakabi ea yuiwe— aka Jonatánen xabakai chanikin:

—Chanimaki. Buna bata bechitan en jashi jawen debuwen besti pukutan eskadabes en me bestibidanshinaki. En jaska wabidanshinawen taeadan, dateama en mawatiduki— aka

⁴⁴jancha kushipawen Saúlun yuikin:

—Jonatáan, en jaska jancha yuibainawen taexunan, min mawamakenan, bikajaidawen Diosun jau ea kupixanunwen— akaya

⁴⁵jakia jaska wai jawenabun ninkatan Saúl kemakin:

—¿Jaskatan e iskaun Jonatán mawatidumen? Jonatánen jawenabu Israelin enabu Filisteo nawabu dasibi nuku maemamaxunkin keyuxunbidanawen taea mawatidumaki. Jaska Jonatánen abidanadan, Diosun medabewaya Jonatánen abidanawen taea Jehová jiwekunkainaya Jonatán mawai jau tin iyamanunwen, jawen bu dikabi betsa teseamadan— akin Jonatán jau mawayamanun jaska yuikin Saúl nemanibukiaki. ⁴⁶Jaskaken jatun maiwan pakea anu Filisteo nawabu chintunbainaibun Saúlun ibubis shinantan ana jatu chibanma jatu jenetanikiaki.

⁴⁷Jatu jaska watan tsuan ana nematidubuma Israelin enabu dasibi yunukubainkin Saúl xanen ibujaidakin nawabu jiwebaunabu jaki sinataibu jatu nemakin maemakubainikiaki. Moab nawabu inun, Amón nawabu inun, Edom nawabu inun, mae betsa Sobá anua xanen ibubu inun, Filisteo nawabudan, janida jatun mae anu kakin jatu maemakubainpaunikiaki.

⁴⁸Saúlun jawen detenamenikabu jatu ichawatan iyuxun Amalec nawabu maemakin keyunibukiaki, nawa tibi dasibidan, Israelin enabu yumetsubidanbidanmisbu jatu nemaxunkin keyukubainkinan.

⁴⁹Jati Saúlun bakebu inibukiaki, jawen juni bakebudan, Jonatán inun Isví inun Malquisúadan. Janua jawen ainbu bake dabedan, iyua Merab inun maxku Mical inibukiaki. ⁵⁰Saúlun ainin kenadan, Ahinóam inikiaki. Ahinóamnen epadan, Ahimaas inikiaki. Janua Saúlun detenamenikabun xanen ibudan, Abner inikiaki. Jawen epadan, Ner inikiaki, Saúlun epa betsadan. ⁵¹Abielin bake dabedan, Ner inun Quis inibukiaki. Quisdan, Saúlun epa inikiaki.

⁵²Saúl janua xanen ibuima jiwekunkainkin Filisteo nawabube detenamei jeneama mesebiaken Saúlun juni kushipabu katutan jau jabetan Filisteo nawabu detenunbun jatu ichawakubainikiaki.

Saúlun jawen yunua akin pewaxunama kaneaya Diosun dananikiaki, na janchadan

15 ¹Xaba betsatian Samuelin Saúl yuikin:

—Diosun enabu Israelbu min jatun xanen ibunun en mia katuima Jehován eska mia yuikiki. Ninkawe. ²Jehová kushipa dasibi

binua eska janchashinaki: “Egipto anua Israelin enabu bekin Amalec nawabun maiwan pakea kapukebainpananbun jatu nemakin niti aniwen taexun natian en jatu kupikatsis ikaii. ³Na jabiatian Amalec nawabu anu buxun jatu detekin keyutankanwen. Jatuwen jawa nuiama dasibi jatu yamawakin keyutankanwen. Junibu inun, ainbuaibu inun, bake mishtinbu inun, dama kainshinabu jatu tenan keyukin januxun jatun ina awa inun, jatun chaxuwan inun, jatun camello inun, jatun asno jatun mabu dasibiyabi yamawakin keyutankanwen”, akin Jehován ea yuikin mikidi jaska janchashinaki— aka

⁴januxun Saúlun jaska ninkatan jawenabu Israelin enabu kenakin ichawatan jawen detenamenika main bumisbu mae betsa Telaím anuxun jatu tanakin 200,000 junibu tanatan januxun Judán enabu 10,000 junibu tanakin keyudiatan ⁵jatu jaska wabainkin iyui Amalec nawabun xanen ibu jatun mae ewapa anu jiweabuki kematan mishkiwen kenebaunibuwen taea napanpa tepakuanu mapubaunxun ⁶Moisin ainen enabu Quenita nawabu Amalec nawabube jusia jiweabuwen taexun jui kushipawen Saúlun jatu yuikin:

—Quenita nawabuun, taxnibidani nedi dasibi kain bekanwen. Amalec nawabube nun matu detekatsi ikamaki. Matubunan, Egipto anua nukun xenipabu Israelin enabu beaibu matun xenipabun jatu duawanibukiaki. Menan jawaida ea ninkabidani bekanwen— jatu wa jawen jancha ninkatan

Quenita nawabu Amalec nawabu anua kainbaini paxaibun ⁷jaskabidanaibun jawen detenamenikabubetan Saúlun Amalec nawabu jatu dete taewakin Havilá anuxun jatu chibanbainkin Egipto maiwan pakea kexa anu mae betsa Surkidi jiki buaibu jatu detekin keyutan ⁸januxun Amalec nawa xanen ibu Agag achixun jawenabu detenamenikabu besti dasibi jatu detekin maematan ⁹jakia Saúl inun jawen detenamenikabun Agag achixun mekeyutan januxun jatun chaxuwan bene inun, yuxan pepabu inun, ina awa bene inun, yuxan xua detekin tenanma jakia jatun mabu pepa kadu betsa meketan januxun jatun mabu pepa bexmas inun jatun mabu atimapa shadabu besti deda deda akin chakabuwakin keyuabun

¹⁰januxun Samuel Jehován jancha wakin:

¹¹—Pe dabanen Saúl en xanen ibu wani en yunua ea akin pewaxunama natian ma ea jeneawen taexun en ma jeneaki— aka jaskakidi Samuel shinanma bika tenekin jau putayamanun meshu chai tanakin Samuelin Jehová Saúlkidi yukaxunshini ¹²penamajaida Saúlki nukutanun ika Samuel kaya tsuanda yuikin: “Saúl Carmel anu kaikiki. Jadixun Amalec nawa detekin keyushinxun jawen unanmati mishki keyatapa benikin jatu nichinmatan janua bai betsa kawen Guilgalkidi butukainikiki”, aka ¹³Guilgal baiwen Samuel kai jadi Saúlki nukua benimakin Saúlun yuikin:

—Jehován jau mia pepawakubainunwen. Jaska Jehován ea yunushinadan, ma en menexunshinaki— abia

¹⁴Januxun Samuelin chitekin yukakin:

—Chaxuwan maan maan ikaibu inun ina awa maan maan ikaibu en ninkaidan, ¿jaskakin en jaska ninkai?— aka

¹⁵Saúlun kemakin yuikin:

—Na inabu bekinan, Amalec nawabun maewan anua nun beaii. Min mekenika Dios Jehová kenwankin ja inabu menukin kuaxunxanun, iwanan, chaxuwan pepa inun ina awa xuadanwan nukunabun mekeshinabuki. Jakia dasibidan, nun yama washinaki— ikaya

¹⁶ninkakatsi ikama nemakin Samuelin jawaida yuikin:

—Jaska ana yuiyamawe. Peswe. Eska Jehován meshu medan ea yuishinai mia yuinun ninkawe— aka

—En mia ninkai ea yuiwe— aka

¹⁷Samuelin ana yuikin:

—Ibubis min jaska jayatiduma min shinanbiaya ninkamas Israelin enabu min jatu xanen ibujaidaxunun Jehován mia katuima ¿min shinanma ishianmen? ¹⁸Eskaki, shinanwen. Jehován mia yunukin jawen nemati kushipawen ja Amalec nawa chakabubu mia detemakin jatun mabu min yama waxanun mia yunushinaki. ¹⁹Jaska shinanma jawen jancha ninkama binumakin jatu detebiakin jatun mabu inun jatun inabu jenebainaibu ¿jaskakin min jatu bianbidanshinamen, Jehován bedubi chakabukidanidan?— aka

²⁰Saúlun kemakin yuikin:

—Jaska Jehován ea yunushina chibankin jawen yunuawen taexun en ma akin keyuxunshinaki. Amalec nawabu dasibi tenan keyutan januxun Amalec xanen ibu Agag neashinabu en iweshinaki. ²¹Chanima Guilgal anuxun min mekenika Dios Jehová ja inankin januxun tenan keyukatsi inabu xua tesenxun menukin keyuxunti nukunabun jatu nawakin ibuwabidanshinabuki— aka

²²Januxun Samuelin yuikin:

“Jehován bechipai benimamisdan,

nun ja ninkakin nun axuain besti bechipaimiski.

Jamen ja inabu xeni menukin keyuxunmisbu inun

jawen kenwanti nami pichanxun pimisbudan,

jawen Jehová benimai bexmasmiski.

Jabun Jehová ninkakin axunkubainmisbudan, jabuwen

benimajaidamiski,

chaxuwan xeni inun jawen nami menukin keyuxunmisbu binuadan.

²³Jabun Jehová ikunwanbuman danankin chakabuwakin Dios sinatamamisbudan,

yushibube dayai mukayakin unanmisbu keskabuki.

Tsuanda Jehován yunuti jancha ninkama jabun yushibu dami kenwanmisbu keskabuki, chakabuwaidan.
 Jamen mian akin Jehován yunuti jancha min danankin chakabuwashinawen taexun natian min nukun xanen ibu ikis mia danandiaikiki”, aka

²⁴Januxun Saúlun Samuel yuikin:

—Pemajaidaki. Chakabu wakin ma en kaneshinaki. Ean en pewai dabanen Jehován yunuti chibanma inun min ea yusinshina mestenwanma nukunabuki datekin jatun jancha dabankin ean jabu besti en ninkashinaki. ²⁵Jakia jaska en kaneshina menan ea jakimadiwe, jaska en mia yukaidan. Ea jaska watan en Jehová kenwain kai ebe chintunkainwen— aka

²⁶kemakin Samuelin yuikin:

—Min ma Jehován yunuti jancha dananshinawen taexun natian min Israelin enabun xanen ibubiaken Jehován mia danainwen taea ana en mibe jadi kamaki— atan

²⁷Samuel kai dabekekainaya ana niti anun ixun Saúlun Samuelin tadi chaipa kexawen tsumantan nininkin ushnian ²⁸jaska wan januxun Samuelin Saúl ana yuikin:

—Na en tadi min ea ushnixu keska wakin Israelin enabun min jatun xanen ibubiaken Jehován mia ma ushnia keska waikiki. Jaska keskadi wakin min xanen ibuai mia ma mebintan Israelin enabu betsa pepa mia binua Jehován katutan inanxanikiki. ²⁹Chanima Diosun jawen kushipawen Israelin enabu jatu duawakubainmis chani chakaisma inun jawen shinan betsa waismaki, juni betsa betsapabun jatun shinan betsa wamisbu keskamadan— aka

³⁰Saúlun Samuel ana yuikin:

—Chanima kanei en chakabushinaki. Jakia en mia yukakin ea akaii. Jau Israelin enabu inun jatun anibu unanepabun nun kai uinkin jau ea xanen ibuai eki meseyununbun jaskama ebe kaxun min Jehová Dios ea duawakin ea kenwanmayui kawe— aka

³¹Jawen jancha ninkatan Saúl Samuelbe chintunkaini kaxun danti iki beti itan jatun mekenika Jehová Dios kenwankin meneaya ³²Samuelin jatu yunukin:

—Amalec nawa xanen ibu ea bebun nichin bekanwen— jatu wa januxun iweabu Samuel bebun nixun Agagin shinain: “Ma en chakabu binushinaki”, ikin shinain: “Ea ana tenankin deteabumamenkain”, ixun shinanbiaya ³³jakia Samuelin Agag yuikin:

—Min machatu chaipa kenujaidawen ainbuaibu ichapa min jatu bakeuma waniwen taea min ewa jatu keskadiai bakeumadi ikunkainxanikiki— akin Guilgal anuxun jawaida Jehováki nukuti tadi

jiwe bebunxun Samuelin Agag dedakin tenankin bais bais akin keyutan
³⁴janua Samuel jawen jiwe Ramá anu kaya Saúldi jabe paxkakaini
 jawen mae Guibeá anu chintunkaini jawen jiwe anu ka jiweyuaya
³⁵jaska kainima Samuel mawadiama ana jaki nukuxun uianma inikiaki.
 Jehován shinain: “¿Jaskakin Saúl Israelin enabu en jatu xanen ibu
 waxunimen?” ikin shinan betsaiden taea jaska waxun Samuel Jehován
 shinan betsaidumawen taea Samuelin ana uianmabia jawen nuijaidai
 kaxakunkainikiaki.

David jau xanen ibuxanun Diosun katunikiaki, na janchadan

16 ¹Atimas Jehován Samuel yuikin:
 —¿Saúlwen taeadan, jatian jawen nui kaxakunkaini min
 jakimaxanai? Israelin enabu Saúl jatu xanen ibuxunkunkainai ana
 jaskai en bechipaiamaki, min jaska shinainan. Menan benikain ja piti
 xeni min chaxuwan maxun bishtuki mata watan Belén anu juni betsa
 Jesé jiwea anua jawen juni bake betsa jau ja Israelin enabu xanen
 ibuxunkunkainxanun en ma katushinawen taea jadi katanwen— aka
²Samuelin kemakin yuikin:

—¿Jaskakain en mia axuntidumen? Min ea jaska yunua xanen ibu bena
 katui en kaya Saúlun tapintan ea tenanxanikiki— aka
 kemakin Jehován yuikin:

—Belén anu ina awa bake babupa buxun: “Jhová kenwantanun ika
 matu anu en juaii”, iwanan, jatu yuitanxanwen. ³Ina awa bake tesenxun
 jawen xeni menukin keyuxun pichantan Dios kenwankin jawen nami en
 mibetan piyuaii, iwanan, Jesé kenaxanwen. Min jadixun jaska wai kai en
 mia yuixanaii. Ja xanen ibuxanai Jesén bake betsa jadatuda en mia yuikin
 yunua katukin xanen ibu kushipa medibi wakin xeni maxu axanwen— aka

⁴jaska Jehován yunua Samuelin abaini kai Belén anu jikiaya ja mae
 anua anibu unanepabu kainbidan dateyabi ikin Samuel yukakin:

—¿Unanumawen taea min juai?— akeakeabu

⁵kemakin Samuelin jatu yuikin:

—Jaa. Unanumawen taea en juaii. Jhová kenwankin na ina awa bake
 babupan xeni menukin keyutan jawen kenwanti nami matubetan pinun
 ika en juxuki. Matunmebi dachuki petan jawen kenwanti nami ebetan
 pikanwen— jatu watan

Jhován Jesé inun jawen juni bakebu jau ja medibi pepa wanun
 Samuelin Jhová jatu yukaxuntan ina awa xeni menukin keyuxun
 jawen kenwanti nami jua jabetan pinun, iwanan, Jesé inun jawen juni
 bakebu kenakin Samuelin juni betsa yunua ⁶jatu yuia bei jikiabun
 Jesén juni bake iyua Eliab Samuelin uinkin: “Chanima jaki, Jehován
 ma katushinadan, jau Israelin enabu xanen ibukunkainxanunan”, ikin
 shinanyan

7Jakia Jehován Samuelin shinan uinkin yuikin: “Jaskamaki. Jawen yuda jawendua keyatapa xua uinyamawe, en ma danainan. Junibun bemakis jatu uinmisbu keska wakin miandi bemakis uinyamawe. Jakia ean uinkinan, jatun juinti medan pe besti shinainbu en unanti wamiski”, aka

8Januxun jawen juni bake betsa Abinadab kenaxun Jesén Samuel uinma jakia Samuelin yuikin: “Jhován ja katuamadiki”, aka 9Januxun jawen juni bake Samá kenaxun Jesén Samuel uinma jakia Samuelin ana yuikin: “Jadi Jehován katuamadiki”, aka

10Jesén jawen 7 juni bakebu uinmakin keyua Samuelin yuikin: “Na jatibudan, Jehován tsua katuamaki”, iwanan 11jawen jenekin ana yukakin:

—¿Jatismen, min juni bakebudan? ¿Ana betsa jayamamen?— aka kemakin Jesén yuikin:

—Chaxuwan jatun mekea maxkujaida besti nenu jayamaki— aka Samuelin Jesé yuikin:

—Jau benatanunbun jawaida jatu yunuwe. Janua ja juaya Jehová kenwankin benimai nun taewatiduki— akaya

12Jesén jatu yunua buxun itanabu jawaidakidani ja bedunan jawen bake maxku jikiaya jawen yuda jawenduajaida inun jawen bedu jawenduadi Samuelin uianyan januxun Jehován Samuel yuikin:

—Ja niadan, jaki. Jau Israelin enabu xanen ibujaidaxanun benitan piti xeni maxu adiwe, katukinan— aka

13Jaska wa Samuelin ninkatan xeni bua jawen kapankankia bitan jawen epa Jesé inun jawen betsabun uiainbun bedunan jawen kena David piti xeniwen Samuelin maxu akin jau Israelin enabun xanen ibukunkainxanun katuaya jabiatandi Jehován Yushinin David kushipa wakin taewaya jawa ana manai niti ikama jatu yuibaini Ramá anu jawen jiwe anu Samuel chintunkainikiaki.

David Saúlun medabewanika inikiaki, na janchadan

14Januxun Jehován yushinin Saúl jenebainken jakia jau bika tenemakubainxanun yushin chakabu Jehován yunua jaki jikishina Saúl ana shinan pewamamakin bika tenemaya 15jawen tsumabun Saúl yuikin:

—Xanen ibuun, Jehován ma yunua yushin chakabun mia bika tenemaikiki, min unainmenkainan. 16Mia jaska waya tsuanda arpa mawa unanjaidai jau mia benaxuntanunbun min tsumabu nuku yunuwe, nun benai kaidan. Yushin chakabun mia bika tenemai arpa mawanikatun mia mawaxunaya min pekunkainxanai, ja min bika teneaidan— akeakeabu

17Jawen tsuamabu kemakin Saúlun jatu yuikin:

—Peki. Juni betsan arpa mawa unanjaidai ea benaxunbauntankanwen. Bechitan ea iwexuntankanwen— jatu wa 18jawen tsuma betsan Saúl yuikin:

—Belén anuxun Jesén juni bake maxku David jawenduatun arpa mawa unanjaidai inun ja dikabi kushipakain detenamea unain inun pe shinain janchai pemis en uinmaki, Jehován jaskai medabewakubainaidan— aka

¹⁹januxun jau yuixuntanunbun Saúlun jawen tsumabu Jesé anu jatu yunukin: “Belén anu buxun Jesé ea yuixunkin: ‘Min juni bake Davidin chaxuwan mekenika ea nichinxunwen’, akin Jesé ea yuixuntankanwen”, akin jatu yunua

²⁰buxun Saúlun jancha Jesé yuiabu ninkatan jawen bake nichinxunkin jau jaya iyutanunbun asno kamaki misi saku mata inun bichi bishtu vino mata nanexuntan janua cabra bake asnoki duntanxun Saúl anu jaya yunua ²¹kai jikixun Davidin Saúl yuikin: “Ea Jesén bake mianu ma en juxuki, mia dayaxunidan. Janua en epan na piti inankuin mia yunushinaki”, aka januxun Saúlun jawen medabewanika wakín David bechipajaidakin katushinxun ²²januxun Saúlun jawen jancha ana Jesé bumakin: “Mia ea akin min bake David min ea nichinxunshina en bechipajaidaiwen taexun ea jenexunwen, jau ea anu ikunkainxanunan”, akin jawen jancha bumanikiaki. ²³Januxun jaska washinken yushin chakabu Diosun yunua Saúl bika tenemakin ana taewaya Davidin arpa mimawa pewaxunaya Saúl anua yushin chakabu taxnikainaya Saúlun ana pe shinanpaunikiaki, bexteketan petun besuidan.

Filisteo nawa Goliat Davidin tenanikiaki, na janchadan

17 ¹Israelin enabu detenamenikabube detenamenun ika Filisteo nawa xanen ibubun jawen detenamenikabu jatu ichawabidan Judán enabun maiwan pakea anu mae betsa Socó inun Azecá namakis Efesdamim mae anu jatun tadi jiwe puntebaunabun ²janua jaskadai Filisteo nawabube detenamenun ika Saúlun jawenabu ichawadiabidan paxku Elá napanpa anuxun jawen detenamenikabubetan jatu detenun ixun pewakin jatun tadi jiwe puntediatan januxun Filisteo nawabube detenameti mabu pewaibun ³janua mati mananan betsauidi Filisteo nawabu mapubaunabu inun ukedi mati mananan betsa anudi Israelin enabu mapudiabaunabu ja paxku napaku namakiswen taea paxka uinanainbun ⁴janua Filisteo nawa detenamenika betsa jawen kena Goliat jawen yuda keyatapajaida 3 metro jaya jawen maewan Gat anua jua jawenabu nashui ika niken ⁵tsuan jau deteyamanun jawen buxka junekin maiti bronce mane sawea inun bronce mane tadi jawen xuchi anu inun pechiudi junekin sawedia jawen xankama 55 kilodan, ⁶jawen kishi inun jawen bikedan anu junediakin bronce mane sawedia ja putakin jatu chachiti jashi bronce manedi inun, ⁷jawen ji kushipa chachiti jashi ewapa nunkupa jawen debu acero mane kenujaida jawen xankama 6 kilo ia inikiaki. Jawen medabewanikan jawen detenameti mabu buxunmis bebukainaya ⁸Goliat kainkidan nixun jui kushipawen Israelin enabu jatu yuikin:

“¿Jaskai detenamenun ika bebiashina man jamen mapuabumen? Eadan, en Filisteo nawaki. Jakia matudan, man Saúlun tsumabuki. Butukidan tsua ebe detenameyuimenkain, juni betsa matu anua katutan ea anu yunukanwen, jau ebe detenameyununan. ⁹Matunabu betsa detename unaintun ea maemaya nuku dasibibu nun matun dayadu ikunkainxanaai. Jamen ean en ja juni maemaken matu dasibibudi man nukun dayadu ikunkaintiduki. ¹⁰Ikis Israelin enabu detenamenikabu tibi yuikin en matu shinanmaai. Jau ebe detenameyunun bestichai yunukanwen”, jatu wa

¹¹jaskai Saúl inun Israelin enabun Filisteo nawa janchai ninkatan ana jawa benimama punu nukatan jaki datei keyuaibun

¹²⁻¹⁴Saúl xanen ibuyuken Belén anua juni betsa Jesé anibujaida 8 juni bakeya jawen bake maxku Davidan, Jesén 3 juni bake iyua, Eliab inun Abinadab inun Samá Filisteo nawabube detenamenun ika Saúlbe ma bushianbu ¹⁵janua uatian Saúlun David kena jubiashina ana jawen epan chaxuwan meketanun ika Saúl anua taxnikaini Belén anu chintunkainshinken

¹⁶ja Goliat taxnikidankidankin xaba tibi penama inun badi kaya tibi jatu kaxe janchawen yuikin Israelin enabu sinatamakubaini 40 día jatu bika tenemaya ¹⁷xaba betsatian Jesén David yuikin:

“Xekiwan trigo tsui 20 litro inun 10 misi bitan jatun tadi jiwe anu min betsabu buxuntanwen. ¹⁸Ja dikabi jatun xanen ibu bexmas inankuinkin 10 awa chuchu tanki buxundiatanwen. Min betsabu jaskadamenkain, jatu ea uinxuntanwen. Min betsabu ma pe jiweabumenkainan, kakape ninkatankin ea yuiyutanwen”, aka

¹⁹jabatiandi Saúl inun Davidin betsabu inun Israelin enabu detenamenikabu Elá napaku anua Filisteo nawabube detenameibun

²⁰David penama bestentan jawen epan chaxuwan juni betsan jau mekexunyunun yunutan piti jawen epan yunushina jatu buxuin kai jatun tadi jiwe puntebaunabu anu jikitushiaya Israelin enabu detenamenika mapubainabu jatun date jenei ana dateama detenamenun ika sai sai iki keyuaibun ²¹mati dabe anua beisinanbukuin Israelin enabu inun Filisteo nawabu mapubauna uinanainbun ²²janu piti inun mabu mekeabu anu ja piti buxu janu adubaini detenameibu uinun ika kushikain ja mapubaunabu anu jikixun jawen betsabuki nukuxun yukakin: “Man jaskadamen, nukun epa en yui kaidan”, iki ²³jawen betsabube David janchai jenediamaken Filisteo nawa mapuabu anua mentsisipa jawen mae Gatdan, Goliat ana taxnikidan ana Israelbu mesewakin jau tsuada jabe detenameyunun jabias jancha jatu yuikubainai ana jatu jancha wai Davidin ninkaya

²⁴Israelin enabun ja Goliat uin jawen taea datei paxanun ika chixtekidi jukidan ²⁵yuinameakeakekin:

—¿Ja juni keyatapa taxnikidanaidan, man uiain? Jau jabe nun detenamenun nuku kaxe wakin nuku bika waikiki. Tsuanda maemakin tenanken nukun xanen ibujaidatun mabu ichapa inankin jawen ainbu bake ainwanmatan chipu jawenabus impuesto pei ana yukama ikunkainxanikiaki— ikea iakeabu ²⁶ninkatan jadi mapuabu Davidin jatu yukakin:

—Ja Filisteo nawan matu kaxe wakubainai tsuada jabe detenamekin tenankin yamawakenan, ¿ja juni detenamenika Saúlun jawa inanxanai yuishinamen? Dios jiweatun detenamenikabu kaxe wakin bika tenemakubainai tsua ikimenkain, jawa Dios ikunwanmadan— ikaya

²⁷Goliat tsuanda tenainwen taexun jawada Saúlun ja inanxanai ana jabias jancha dama yuixu jabun David yuiabu ²⁸jakia jaska yuiaibu jawen betsa iyua Eliabin ninkatan jaskakidi David yuiaibu ninkatan jawen betsa jaki sinatakin David yuikin:

—¿Jaskai min nenu juamen? ¿Janu tsua jiweabuma anu nukun epan chaxuwan ichapama tsuan mekexunyunun min yunubidanshinamen? Nun jatube detenamei besti uintanun ika min jua min datemanikapai jaska chakabu shinain en ninkaii— aka

²⁹kemakin Davidin yukakin yuikin:

—¿En jawa jancha chakabuwaiwen taexun min ea ja akai, damajaidabin en janchai?— itan

³⁰jawen betsa dapaxkabaini kaxun juni betsa yukakin:

—Ja Filisteo nawabe detenamekin maemakenan, Saúlunan, jawa inanxanikiaki— aka jabias betsabun yuikanxu jabiaskadi David banabimakin yuidia ³¹David yuka ikai betsabun ninkabaini kaxun Saúl yuiabu ninkatan jau David iwenunbun jatu yunua ³²David kaxun Saúl yuikin:

—Ja Filisteo nawawen datei jau punu nukayamanunbunwen. Eadan, en min dayaduwen taea en jabe detenamei kaii— aka

³³kemakin Saúlun David yuikin:

—Miadan, min bedunanki. Ja Filisteo nawa keyatapabe detenamei min mesti min katidumaki. Jakia ja ikidan, bedunan detenamekunkaunmis beya juni ewaki— aka

³⁴Davidin yuikin:

—Eki chiti iwe. Eadan, en min dayadu en epan chaxuwan en mekexunkubainai león june juxun chaxuwan achixun tukunbainai ³⁵jawaida chibanbain kusha kusha akin chaxuwan tukuan en xetakax akubainmiski. En jaska wa eadi pinun ika ea shinanbidani juai jawen daniwen tsumabain en mestentiwen kusha kusha akin en tenanmiski, dateamadan. Oso dikabi juxun yumetsukainai en jabiaskadi wamiski. ³⁶¿Jaskakin león inun oso detekin en amis keska ja juni Filisteo nawa Diosuma en jabiaskadi watidumamen? ja Dios jiweatun detenamenikabu

jatu mesewakubainaidan. ³⁷Inu betsa león inun oson ea mesewai Jehován ea jatu binumakubainmis keska wakin ja juni Filisteo nawa keyatapatun ea mesewabiaya Jehován ea medabewadiatiduki— aka

ninkatan Saúlun David yuikin:

—Jaskakenan, katanwen, Jehová mibe kaxun mia medabewaikikidan— atan

³⁸Januxun Saúlun jaya detenamemis tadi jau David sawemanunbun jatu yunua David mane tadi sawemakin jau jawen buxka junenun mane maiti maimatan jawen yuda junekin mane tadi jawen xuchi anu inun jawen pechiudi junekin sawemabu ³⁹jawen deteti chaipa kenujaida ibubis bitan Davidin usuntan jaska sawekin beyawaisma xankamaken kapaikin danantan Davidin Saúl yuikin:

—En jaska beyamawen taea jaska sawetan en kushikaintidumaki— itan Saúlun mane tadi pekaxuntan ⁴⁰jawen bamati ji besti tsumabaini kakin paxku namakia 5 mishki tunkupabu katuxun jawen kapankanki nanetan mishki jaki nanetan putati tsumabaini Goliatki kemai kaya ⁴¹jawen medabewanika bebuxunkidanaya janua Goliat unanxubida jachun jukin ⁴²⁻⁴⁴unudia David uinkin juni bedunan jawen yuda jawenduajaida inun jawen bedu jawenduadi jaskabe detenametima Filisteo nawan David yuikin:

—Eadan, en kaman dabanen ¿min ji mestentiwen min ea kushanun ika juai?— akin jawen yushibun kenawen David yuputan: —Jaskakenan, nedi juwe, min namidan, peiyabu inun piananbu en mia jatu inainan— aka

⁴⁵Januxun Davidin kemakin yuikin:

—Miadan, jashi dabe inun machatu chaipa kenujaidayatun ea detenun ika min juaii. Jakia eanan, Israelin enabu min jatu mesewakin datekubainaiwen taea jatun mekenika Dios Jehová dasibi kushipa binuatun kenawen taea mibe detenamenun ika eadi en juaii. ⁴⁶Jaskawen taexun Jehován ea medabewa en mia maemaya ikis mia detekin tenantan min buxka en mia texteaii. Ja dikabi man Filisteo detenamenikabu en matu tenan matun nami peiyabu inun piananbu en matu inaiin. En matu jaska waya mai jidabi anu jiwebaunabun Israelin enabun mekenika Dios kushipajaida jaya unanxankanikiki.

⁴⁷Na nenu nun detenamei ichabudan, nukubudan, jawa machatu chaipa kenujaida inun jashiwen Jehován nuku detenamemakin jiwemama dasibibun man unaiin. Na detenamei nun juadan, Jehovánaki. Jaskaken Jehován matube detenamemakin nuku matu maemamaikiki— aka

⁴⁸Jaska wa Goliat ninkai benitan Davidkidi jui kemakunkidanaya jabiatandi David jawaida jadi kushikain ja bebun nitan ⁴⁹jawen meken mistubain jawen kapanan anua mishki tunkupa bixun putatiki nanetan bekun bekun akin mishki tunkuwen Goliat betunku anu tsakakin bepesa

ja mishki jawen betunkuki usuan jaska wa mawai besuudi tin iki main di ikaya

⁵⁰jaska wakín Davidin Filisteo nawa maemanikiaki, jawen bekun bekun akin putatiwen inun mishki tunkuwen besti Filisteo nawa keyatapa tenantan jawa machatu chaipa kenujaida buama ikawen taea ⁵¹kushikain jawen yuda dapi kaxun Goliatin machatu chaipa kenujaida jaya sitan ibubis jawen buxka textekin tenanyan ja bestitun detename unain jaki chiti ikabu ma tenan mea Filisteo nawabun uintan datei paxai kushibainaibun ⁵²Israelin enabu inun Judán enabun jatu uintan jatu detenun ika jui kushipawen sai sai ibainkin jatu chibanbainkin jatun detetiyaxun Filisteo nawabu maewan dabe Gat inun Ecrón mishki kenebaunibu anu jatu jenetan Saaraim bai kawen inun Gat bai kawen Ecrón anu bai ka namaki Filisteo nawabu midima debua mania uinkubidani

⁵³jatu chibankubaintani ana chintunbidan Filisteo nawabun jatun tadi jiwe puntebaunshinabu anu jikitan jatun mabu biankin tsispu keyuaibun ⁵⁴januxun Goliatin buxka textebain Davidin bitan chipu Jerusalén anu bunikiaki. Jakia Goliatin jaya detenamemis mabu Davidin buxun jawen tadi jiwe anu adunikiaki.

⁵⁵Davidin Filisteo nawa Goliat detei kai uinkin Saúlun bebunkidi jawen detenamenika xanen ibu Abner yukakin:

—Abneriin, ¿tsuan juni bake ikimenkain, ja bedunanan?— aka kemakin:

—Xanen ibuun, Diosun nuku uianyan eandi en unanmaki— aka

⁵⁶jawen xanen ibun Abner yunukin:

—Jawen epa tsuamenkain, jatu yukatanwen— aka

⁵⁷ma tapinken januxun Filisteo nawa Goliat detekin tenantankin jawen buxka beaiki nukuxun Abner metsunbain Saúl anu iyua ⁵⁸Davidkidi dasibi ma jakimashina Saúlun David yukakin:

—Bedunaan, ¿tsuamen, min epadan?— aka

Davidin kemakin yuikin:

—Eadan, Belén anua min tsuma Jesénen en bakeki— aka

Jonatán inun David jaibunamejaidanibukiaki, na janchadan

18 ¹Saúlbe David janchai meneaya janua jawen bake Jonatán jabe jaibunamenikiaki, David bechipajaidai ibubis bechipaii keska wakinan. ²Januxun jau jawen epan jiwe anu ana chintunkainyamanun jabanua jabe jiwei jau dayaxunkunkainun Saúlun David nematan yununikiaki. ³Janua Jonatán inun David bechipainamedabei putanametimai jaibunain yubakadabenibukiaki, Jonatánen jawen yuda bechipaii keska wakín Davidkidi shinankinan. ⁴Ja dikabi Jonatánen David inankin jawen bemakia tadi inun jawen sanpu tima tadi pekaxun

sawemakin jawen machatu chaipa kenujaida inun jawen kanun pepa inun jawen nanexeketi pepa inan keyunikiaki.

⁵Jaska Saúlun David yunua axunkin Davidin jawen unanepa uinmakubainaiwen taexun detenamenikabun xanen ibu bexmas Saúlun David washinken januxun Saúlun xanen ibu bexmasbu inun jawen detenamenikabu dasibibun David bechipaikubainibukiaki.

**Dasibibun David bechipaiaibun Saúlun danain
jaki sinatakunkainikiaki, na janchadan**

⁶Filisteo nawa Goliat Davidin tenanshinken Saúl inun jawen detenamenikabuya chintunbidanaibun xanen ibujaida Saúl juai jaki nukunun ika benimajaidabidani Israelin enabun mae tibi anua ainbuaibu jatun mimawatiya kainbidankin shasha ati inun tsadin tsadin atiya nawai kantakubidani Saúlki nukui ⁷jabias kantati kantakin jeneama yuikin:

“Saúlun 1,000 junibu tenanshinaki.

Januxun Davidin 10,000 junibu tenanshinaki”,

iki jeneabumaken

⁸jaskaibu Saúlun ninkai bechipaiaama sinatajaidakin yuikin:

—Davidin 10,000 tenanshina yuikika. Jamen eanan, ¿1,000 besti en tenanshinamen, jaskakidi man nuku kenwainan? ¿Man daka jawaida matun xanen ibu wai ikai?— ikin

⁹ja David jaska waibu ninkai Saúlun jakidi shinan chakakin danan taewabainaya

¹⁰jaska washina xaba betsatian Diosun yunua yushin chakabun Saúlki jikitan jawen jiwe jawendua anua Saúl duxku itsai bika teneaya xuxawakin mimawaxunmis keska wakin arpa Davidin mawaxunaya Saúlun jashi tsumaxun ¹¹David chachikin keneyabi tsanpa wanun, iwanan, jawen jashi Saúlun jakidi puta Davidin jashi binui dabekeaya dabeki chachipaikin kanea

¹²ana Jehová Saúl medabewama David medabewaiwen taea Davidki Saúl datekunkainkin ¹³ana jabe jiwemama nichinkin jau jatun detenamenikabu xuku betsa jau yununun comandante wakin David yunushina jatuki sinataibube detenamemakin Davidin jatu iyutantankin iwebidanbidanaya

¹⁴Jehová David medabewa jatu detenamemakin jatu yunukin pewakubainai ¹⁵Davidin jatu jaska wamai Saúlun jatu uin ana jawen datejaidaya ¹⁶jakia jatube detenamenun ika butan butanaibun Davidin jatu pe yunukubainaiwen taexun Israelin enabu inun Judán enabu dasibibun David bechipaiaibun

¹⁷xaba betsatian Saúlun ibubis shinankin:

—Ibubis en David tenantidumaki. Jakia Filisteo nawabun ea axuntidubuki— iwanan, David kena jua Saúlun yuikin:

—Tsuki dateama mentsisipai Jehová Dios min detenamexunkunkainaiwen taexun en ainbu bake iyua Merab en mia bimaxanai— aka ¹⁸jakia Davidin kemakin Saúl yuikin:

—Xanen ibujaidatun dais en itidumaki. Eadan, en jawaumaki. Ja inun, Israelin enabu anua enabudi jawabumaki. Jaskabiaken min bake min ea bimakatsi ikai en bitiduki— aka

¹⁹jakia David Merab ainwanmanun, iwanan, jaska yubashina ma kemaya David mebintan juni betsa Adriel mae Meholá anua Saúlun jawen ainbu bake Merab inankin bimaken ²⁰jakia jawen ainbu bake betsa Mical Davidbe bechipainameai tsuanda uintan Saúl banabimabu ninkai benimajaidakin ²¹ana shinankin: “Jatube detenameeya Filisteo nawabun David jadixun tenanxankanikiki. Jaskaken en bake Mical bimatun yunu chakamakin Filisteo nawabu en jatu tenanmatidumenkain”, itan David ana kenatan yuikin:

—Davidiin, eskatianan, en mia dais waxanaii, en ainbu bake betsa mia bimakinan— atan

²²januxun jawen tsumabu Saúlun yunukin jatu yuikin:

—Tsuana ninkama David bestibe janchakin ea eska yuixunkanwen: “Nukun xanen ibujaidatun mia bechipajaidaikiki. Ja inun, jawen dayadu dasibibunan, nun mikidi pe shinankubainmiski. Xanen ibujaidatun dais ikunkainxanwen, jawen bake biantanan”, ea waxuntankanwen— jatu wa

²³Saúlun dayadubu David anu buxun jabias jancha yuiabu jakia Davidin jatu kemakin:

—¿Xanen ibujaidatun dais ikunkaini bikama dabanen man shinain? ¿Jaskai nuitapabiai en xanenibun dais itidumen? En mitanumaki— jatu wa

²⁴janua Saúl anu ana buxun Davidin jancha banabimakin yuiabu ²⁵jau Filisteo nawabun David tenanxanunbun Saúlun kemakin jatu ana yuikin:

—“Nukun beya chibankin ainbu juni betsan bikatsidan, jatun epa bebunkidi mabu ewapa bixunmisbuki. Jamen eanan, en xanenibun yunuaidan, jaska en shinanmaki. Jakia nukuki sinatamisbu kupikin Filisteo nawabu tenantan 100 jina kubichi mextebidan ja dukun ea bexuntiduki. Jaska besti jakidi en shinaiin”, jaska David ea yuixuntankanwen— jatu wa

²⁶David anu ana buxun Saúlun jancha yuiabu Davidin ninkatan:

—Jaskakenan, peki. Xanenibun ea dais wakatsi jaska bechipaikin yunuaidan, bikamaki— ixun janu Saúlun yubashina kemadimabiaken ²⁷David jawen detenamenikabube kaxun jatubetan 200 Filisteo nawabu detekin tenanxun jatun jina kubichi mextetan bexun xanen ibujaidatun daisnun ikidan, ja 200 jina kubichi Davidin Saúl inantushiaiwen taexun jawen bake Mical Saúlun David inanikiaki, ainwanmakinan.

²⁸Jehová David medabewakubainaya jawen ainbu bake Micalin David bechipajaidai uinkin unain ²⁹ana Davidki datekunkainshina binumai ana jaki Saúl datekin danain jaki sinatai jenetiduma inikiaki.

³⁰Jaska inun, betsadan, Filisteo nawa xanen ibubun Israelin enabu

detenun ika beaibu tibi Saúlun detenamenika xukua betsabu jatubetan jatu detekin maemabaiibun Davidin jawenabu binumakin jatu ichapa detexunkubainikiaki, comandante betsabu binukinan. Jaskaiwen taexun Davidkidi dasibibun ninkabauni bechipajaidai jakidi pe shinankubainibukiaki.

Saúlun David tenanpaibia binupaunikiaki, na janchadan

19 ¹Jau David tenanunbun jawen bake Jonatán inun jawen xanen ibu bexmasbu Saúlun jatu yunua jakia Jonatánen David bechipajaidaiwen taea ²David anu kaxun jawen epan jancha banabimakin yuikin:

—En epan mia tenankatsis ikikiki. Jaskaken meshukidi penama bai anu june ka jadi iduyutanxanwen. ³Jadi min ka anu en epabe en kaxanaii. Jaskada mikidi ea yuimenkain. Tapintan mikidi en jabe janchaxanaii. En epa ma kaken jaska ea yuixu en mia yuixanaii— abaini kaya

⁴ana meshukidi penama jawen epabe bai anu kaxun David medabewakin daewaxunkatsi ikin Jonatánen jawen epa Saúl yuikin:

—Xanen ibuun, min tsuma Davidinan, jawa chakabuwakin mia chakabuwama jaki sinatakin meyamawe, pe besti mia axunmiskidan.

⁵Eskawen taexun ea ninkawe. Filisteo nawa Goliat detenamenika mesebiaken David dateyamakain Jehován David medabewaya Filisteo nawa nuku putamaimadan, uintan ibubis min benimaimaki. Jehován jancha danankin jawa chakabuwaismabiaken ¿jawawen dabanán David min tenankatsis ikai?— aka

⁶Jonatánen jancha ninkakin shinantan atimas kemakin yuikin:

—Aa, chanimaki. Jehován nuku ninkaya en mibe yubakaii. David en ana tenanmaki. Jau jiwepakexanunwen— abaini kaken

⁷januxun Jonatánen David kenaxun jaska ibube janchaxu banabimakin yuikin daewaxun Saúl anu David iyua jaska waxunkubidanima keska wakin Davidin ana Saúl medabewakubainaya

⁸ana jatube detenamenun ika Filisteo nawabu Israelin enabu maiwan pakea anu ana bei jikiabu jatu nemakin putanun ika jawen 1,000 detenamenikabuya David ka Filisteo nawabube detenamekin jatu maemakin midima tenainbuwen taea Filisteo nawabu jabu jiwunun ika datei paxai keyuabun ⁹meshu betsatian Diosun yunua yushin chakabu Saúlki ana jikia Saúl duxku iki itsai bika teneaya xuxa wakin bextenun, iwanan, arpa Davidin mimawaxunaya jawen jiwe anu jashi tsuma Saúl tsauxun ¹⁰David chachikin keneki tsanpa wanun, iwanan, jawen jashi Saúlun jawaida jaki puta jakia Davidin binui dabeketanai kene besti chachia niken jaska wakin datea uinbaini jabias meshu medan jawen jiwe anua David kainkaini paxaken ¹¹jawen jiwe anu jau jawaida kexexun

uinunbun jatu mekemakin penama taxnikainai jau tenanxanunbun jawen tsumabu betsa betsapa Saúlun jatu yunua buxun kexeaiibun jakia jawen ain Micalin David yusinkin yuikin:

—Ikis paxadiwe. Nenua min paxamadan, meshukidi min mawatiduki— atan

¹² uinti xui anu dispi kushipawen Micalin David jabis meshutian butea paxaken ¹³ dami yuda itsa bexun Davidin uxati anu datanxun dami buxkaki cabra dani tima maimaxun dakukutiwen Micalin yabuken ¹⁴ jau David jawaidabain achitanunbun Saúlun jatu yunua jawen jiwe anu bua yuka ikaibun jakia Micalin jatu yuikin:

—Jawen uxati anu isin teneikiki— jatu wa chintunbain Saúl yuiabu, ¹⁵ jau David jawen uxati anu ana jabi benatanunbun Saúlun jatu yunukin:

—Jawen uxati anu dakabiaken kainmatan ea anu iwetankanwen, jau nenuxun tenanunbunan— jatu wa

¹⁶ Saúlun tsumabu ana buxun Davidin jiwe anu jikibain jawen uxati anu dami yuda itsa cabra dami tima maitiya bechitan jawen bake Mical besti achitan iyuxun jaska bestikidi uinkanxu yuiabu ¹⁷ Saúlun Mical yuikin:

—En jaki sinatai jani junekin nichinxun ¿jaska wakin min ea jaskawen padanxumen?— aka

padankin kemakin Micalin yuikin:

—Paxai en nema ea yuikin: “En kai ea nemayamawe, en mia tenantidukidan”, ea watan kashianki— aka

¹⁸ jaskakaini David junekaini Ramá anu Samuel uin kashinxun jaska Saúlun ashian Samuel yui keyushina janua jabe maei mae betsa Naiot anu David Samuelbe jiwei kaken ¹⁹ jadi jiwei bushianbu Saúl banabimabu ²⁰ ana David jau jadia achitanunbun jawen tsumabu Saúlun ana jatu yunua bui kemaxun Diosun janca yuixunikabu Samuelin jatu imaya nishi paewen paeen keska benimakin Dios kenwankubidanaibu uianbun jawaida Diosun Yushinin Saúlun tsumabu jabudi jatu betsa wa Diosun janca yuixunikadiai nishi paewen paeen keska benimakin jatubetan Dios kenwainbun David tsuan jawa wama

²¹ jatu yunua bushianbu jaskaibun Saúlun ninkatan jawen tsuma betsabundi David jau achinunbun ana jatu yunua buabu Diosun Yushinin jatu jabiaskadi wai ninkatan jawen tsuma betsabu Saúlun ana ja kachu jatu yunua buaibu Diosun Yushinin achixun jabiaskas jatu wakubainaya ²² janua ana ninkatan ibubis Ramá anu Saúl kai Secú anuxun janu unpax aduti ewapa anu jikixun jatu yukakin:

—Samuel inun Davidan, ¿janimen?— jatu wa, ichapabun kemakin yuikin:

—Ramá dapi Naiot anu jiweabuki— akeakeabu ²³ jadidi kai bai tanabaini namakisxun Diosun yushinin Saúl betsa wakin kushipa wa

ja dikabi paean keska benimakin Dios kenwankubaini Ramá dapi Naiot anu Saúl jikitan ²⁴januxun jawen tadi pekakin keyua Samuel bebunxun xaba bestichai inun meshu bestichai kaya nishi paewen paean keska ikunkainkin Dios kenwankubaini penama jawen shinan jaki dasi keyua dakejaidai jawa yuiama Saúl jawen jiwe anu chintunkidanikiaki. Jaskakidi jakidi yuipaunibudan: “¿Saúldan, jabiadi Diosun jancha yuixunikadi ikimenkain?” iake iakepaunibuki.

Jonatánen David medabewanikiaki, na janchadan

20 ¹Saúl kaken Ramá dapi Naiot anua David jaki datei kainkaini Jonatán jiwea anu jikixun yukakin:

—¿En jawa ana jaska washianmen? ¿En jawa kaneshinamen? ¿Min ibudan, jakidi en jawa chakabujaida washinamen? jaskawen taexun benakin ea tenanun, ika ikaidan— aka

²kemakin Jonatánen yuikin:

—Diosun jaska bechpaiamaki. Min mawama ixanaii. Shinankin ea ninkawe. Ea jawa yuiama eamaki jawa betsa betsapa en epan aismaki. Mia tenanun ika ¿jaskakin ea juntainmenkain? Jaskatidumajaidaki— aka

³jakia ninkamas Davidin ana yuikin:

—Min ea bechpaijaidai min epan unankin mia nuimakatsi ikama ea tenanun ixun mia jaska yuikatsi ikamaki. Jehová inun mian min ea ninkaya ma en debu kema chanima xabakabi en matu yuiaii— aka

⁴Jonatánen yuikin:

—Min jaskadada bechpaiayadan, ean en mia axuntiduki— aka

⁵Davidin kemakin yuikin:

—Eska en shinaiin. Meshukidi uxe bena taxniaitian besikin min epa xanen ibujaidabe tsauxun en pimiski. Janu jabetan nun piatitan en jawen dateaii. Ua meshukidi badi kadiama bai anu en juneyukatsis ikai ea nemayamawe. ⁶Min jabetan piaya min epa ea yuka ikayadan, mian eska ea yuixunxanwen: “Jawen mae Belén anu jawaida kainkin ea ea atan kashianki. Badi tibi Jehová benimawakin chaxuwan xeni menuxunkin keyuxun jawen kenwanti nami jawenabu ichaxun badi tibi pimisubetan pi kashiankiaki”, min wa ⁷mia kemakin: “Peki”, mia wayadan, jaskayadan, unanuma en jiwexanaii. Jamen jaskama eki sinatakin ea chakabuwanai min unanxanaii. ⁸Jaska ekidi janchaxanwen. En ma min dayadukidan, Jehová nuku ninkaya mibe jaibunamei nun yubakanameimaki. Jaskawen taexun en kaneshinken min epa anu ea iyuama mian ea tenandiyuxanwen— aka

⁹jakia Jonatánen kemakin yuikin:

—Jaska tibi shinanyamawe. En epa en ninkayuxanaii. Mia chakabuwakatsis iki mikidi janchai ninkatan en mia banabimaxanaii— aka

¹⁰ ninkatan Davidin yukakin:

—Min epan ekidi chakabu shinanyan ¿tsuan ea banabimatidumen?
min epan mia jaska yuiayadan— aka

¹¹ Jonatánen kemakin yuikin:

—Ua benanta bai anu kananwen— abaini

ja dabe kaxun ¹²jadixun Jonatánen ana yuikin:

—Israelin enabu mekenika Dios Jehovábe en yubakaii. Meshukidi inun ua xaba betsatiandi jabias baditian jaska en epan shinain tapin en jabe janchaxanaii. En epan mikidi shinan pewayá en mia banabimaxanaii. ¹³ Jakia en epan mikidi shinan chakaya en mia banabimama jau Jehován ea kupijaidakubainxanunwen. Jamen jaskama en mia banabimakin medabewaya unanuma min paxaxanaii. Jaska Jehován en epa medabewakubainima keska wakín jau mia medabewadiakubainxanunwen. ¹⁴ Na eskatian jiweyuxun en mia medabewai keska jabias shinanwen jaska Jehován mia duawakubainmis keska en mawadiama jabias kadi eadi duawakubainxanwen. Jakia en ma mawaken ¹⁵⁻¹⁷ miki sinataibu Jehován jatu unanti waxun kupi keyubiaken ea jakimama enabudi duawakubainxanwen— aka
jaskai ja dabe bechipainamei jaibunamenibuwen taea ja dabe ana yubakanibukiaki.

¹⁸ Jonatánen David ana yuikin:

—Meshukidi uxe benaken nun besiaya janu min tsaumis anu min jayamaken mikidi yuka ixankanikiki. ¹⁹ Xaba dabe inun besti kaya min jayamaken janu en epan mia benajaidaxanikiki, pepawen kasmai, chakabu shinankinan. Jaskaken ja mishki tunku mania dapi uatian min janu juneimanu ana jabanudi junetan ea manatanxanwen. ²⁰ Jadi kaxun ja mishki tunku mania anudi min junea anu janu tsua jayama keska anu 3 pia en bishku bishku axanaii. ²¹ Jaska watan en tsuma yunukin: “En pia ea benaxuntanwen”, en aka kaya ana yunukin: “Ja chaima pia mapuaki. Ea bexunwen”, akin en jaska waya en epan mia jawa wamawen taea unanuma min taxnikidantiduki, Jehován ea ninkaya en mia yubaidan. ²² Jakia en tsuma yunukin: “Tudidi nanta mapuaki. Jadi kaxun ea bixuntanwen”, akin en jaska yunuaya min paxatanun Jehován mia jaska bechipaiaya jawaida paxaditanxanwen. ²³ Na jaska nun yubakaxu Jehován nuku ninkatan shinanpakexanikiki— aka

²⁴⁻²⁵ David june kain bai anu junei kaken uxe benatian besikin pinun ika janu xanen ibu tsauxun pi beyamis anu keneki tabia tapu anu Saúl tsaua ja tapu bebun Jonatán tsaua janua Saúl dapi Abner tsaua betsa anu David janu tsauxun pimis xakaken ²⁶ Davidkidi Saúlun jawa yuiama jakidi shinan bestikin: “Jawada Diosun nemani nun metiduma meshina pediamá jutidumamenkain”, ishian ²⁷ besikin jatubetan pikubaini ja kachu xabatian ana David ana jayamaken jawen bake Jonatán Saúlun yukakin:

—Nukubetan besikin pi ¿jaskai Jesén bake meshukidi juama ishian inun ikis ana juamamen?— aka

²⁸ Jonatánen kemakin yuikin:

—Davidinan, jawaida kainkatsis ikin ea yuibainshinaki, jawen mae Belénkidi kakinan. ²⁹ Jawen mae anuxun jawenabun Jehová kenwain besiaibun jawen betsa iyuatun kenakin jau jununwen ashianwen taea: “Enabu jawaidakain en jatu uinyui kai ea nemayamawe”, ea akin yukaiwen taexun en jadi yunua kashianki. Jaskawen taea min jawen xanenibun tapu anuxun mibetan pi ana juyamaki— aka

³⁰ jaskai Saúlun ninkatan Jonatánki sinatajaidakin yuikin:

—Min ewa chakabujaidatun bakedan, min miaki. Jesén bake min jaibujaidawen taea mia inun min ewaki daketidubudan, ¿ean en unanma dabanen min shinain? ³¹ Jesén bake min yaushiaidan, ja jiwekenan, miandaki min en xanen ibuai ea kachu min ea mebin jikitidumajaidaki. Jau mawayunun ja benabauntanunbun jatu yunuwe. Bechitan nedi ea ixuntanwen, en tenainan— aka

³² Jonatánen kemakin jawen epa yuikin:

—¿Jaskadawen taea mawatidumen? ¿Jawa chakabuwashinamen?— aka

³³ Saúlun jaskai ninkatan jawen bake Jonatán chachinun, iwanan, jawen jashi sanantan putakin jaska wai uin: “Chanima en epadan, Davidki sinatajaidakin tenankatsis ikikiki. Jaskakin ea ma unanmaikiki”, iki ³⁴ sinatajaidai tapu anua ana jabetan pikatsi ikama benikaini jawen epan Davidkidi jancha chakabukin kunyan akin bika tenema jawen nuijaidai uxe bena nishian kenwain besiaibu xaba ja kachu Jonatánen ana jatubetan piama jenebaina ³⁵ uxashini penaya jabiatandi David yubashina keskai jawen tsuma bedunanbe Jonatán bai anu kaxun ³⁶ bedunan yunukin:

—Na pia en bishkuai kushikain benakin jawaida ea bixuntanwen— aka kushikainai bebun bishku bishku akin jawen tsuma bebun chaijaida ti tiki axuan ³⁷ janu pia ti ikanu niti itanaya jui kushipajaidawen Jonatánen yuikin:

—Ja min niti ixu ana tudidi pia betsa niaki— akin

³⁸ ana jui kushipajaidawen yuikin:

—Menan niti ikama kushikain bitanwen— aka bitankin jawen tsumapan jawen xanen ibu anu pia bexuanyan ³⁹ jaska wakin bedunan amai unanma jakia jaska unankinan, Jonatán inun Davidin besti unainbun ⁴⁰ januxun Jonatánen jawen kanun inun jawen pia inun jawen detenameti jau buxuntanun jawen tsuma inankin yunukin:

—Nukun jiwe anu ea buxuntanwen— aka

⁴¹ jawen tsumapan buxuin ma kaken mishki tude manchinkin maspuanibu pechiudia David taxnikidan: “Min jaska wakin ea pejaida waxuki”, aki Jonatán bebun David danti iki dabe inun bestiki maiki beti

beti itan benikauan nia jatun beya chibain jabe tantsu idabetan jabe kaxa chakayamai David jui tedis iki texatan ⁴²atimas neseaya Jonatánen yuikin:

—Unanuma kai peditanwen. Nun jaibunamekunkainxanun Jehovábe nun yubakaimawen taexun mia inun ea medabewakin nukunabu pakubainaibu enabu inun minabu Jehován jau jatu medabewakubainxanunwen, nun yubakaimawenan. Jaskawen taexun ekidi pe shinankubaini katanwen— aka

David bai tanabaini kaya Jonatán jawen maewan anu chintunkidanikiaki.

David Saúl anua paxai chajaida junekainikiaki, na janchadan

21 ¹Mae betsa Nob anu David kai jikiaya jawenabu Diosbe janchaxunika Ahimélecin David uin e iki teku ikain jaki nukui kaxun yukakin:

—¿Jaskai mimesti tsuan mia banawabidanma min juai?— aka

²Davidin padankin yuikin:

—Nukun xanen ibujaidatun ea yunukin: “Jawada pewatanwen”, ea akin yunushina jau tsuan unanyamanun ea nichian jukin jadatuda ea yunua en beai en unanmaki. Jamen juni en medabewanikabudan, ja mae anu jau eki nukui benunbun janu en jatu yuibidanshinaki. ³Jaskawen taea en juai ¿jawa piti min jayamenkain? Jatida misi min jaya ⁵besti ea inanyuwe— aka

⁴Diosbe jawenabu janchaxunika Ahimélecin David kemakin:

—Dasibitun ja misi pimisbu en jayamaki. Dioski nukuti tadi jiwe anu jawen kenwanti misi medibi besti en jayaki. Uatian mibe beshianbu ana jatun ainbe chutanamediabumaken jau pinunbun en mia inantiduki— aka

⁵David besu kushitan kemakin yuidiakin:

—Janu nun detenamei kainkainaitian jawa chutanameama nun kamiski. Nun jaska ibiamis natian chai jawada pewai nun juaidan, en junibubedan, nun jawa chakabumaki. Nun kainkidanshina jaskawen taea nun pejaidaki. Jaskaken ja misidan, min nuku inantiduki, dateamadan— aka

⁶misi betsa jayamaken Dioski nukuti tadi jiwe dintu medibi tapu anua Jehován misi medibi watan inanmisbu dama bena waxu xanabidi ikai manchinkatsi ja misi dama maewakin bitanxu Ahimélecin David inanyan ⁷jabiatiandi Saúlun chaxuwan mekenikabun jaskadashina xanen ibu Edom nawa jawen kena Doeg Jehováki nukuti tadi anu nixun dasibi uinkin ninkaya ⁸Davidin Ahimélec ana yukakin:

—¿Min jawa jayamen, jashi kasmai machatu chaipa kenujaidadan? En xanenibun jawaida ea nichian jawaidakidankin en machatu chaipa kenujaida inun en detenameti mabu betsa en beama jushiankidan— aka

⁹Ahimélecin kemakin yuikin:

—Aa, en jayaki, napanpa Elá anuxun min tenankin maemaima Filisteo nawa Goliatin machatu chaipa kenujaida bestidan. Nukunabu Diosbe janchaxunti tadi puntea pechiudi tadi kextupawen yabutan en aduima dakaki. Min bechipaiai min butiduki. Detenameti betsa en jayamaki— aka Davidin kemakin yuikin:

—Pejaidaki, ana betsa jayama jabia bestikenan. Jabia ea inanwen— aka Ahimélecin bitanxun David inan,

¹⁰jabias xabatiandi Saúl anua kai ana paxai junekunkaini Filisteo nawabun maewan Gat anu jatun xanen ibujaida Aquís anu jikitan uin ka niken ¹¹jawen xanen ibu bexmasbun bechitan yuikin:

—Nadan, Davidki, nukun xanen ibujaida Saúlun dayadudan. Nawakin kantabainkin yuikin:

“Saúlun 1,000 junibu tenanshinaki.

Januxun Davidin 10,000 junibu tenanshinakiaki”,

Israelin enabun ainbuaibun ikin kenwainmabukiaki— akeakeabu

¹²⁻¹³chanimajaida jaska waima Davidkidi janchabaunaibu Davidin ninkai Filisteo nawa xanen ibu Aquísin nuku detea ika jaki datejaidai jatu bebunua jaskaismabia dateabu jawen shinan benui duxku keskai jikiti xui beputi betsa betsapa anu jawen mentsisin bexa bexa akin kenekubauni kemu bishtunyain jawen kexniwen bishtun bishku bishku abaunaya ¹⁴jaskai uinkin jawen xanen ibu bexmasbu Aquísin yuikin:

—Ja juni duxkudan, man uiain ¿jaskakin man eanu iwexumen?

¹⁵¿En jiwe anu na juni duxku ikunkainai en uinun man iweamen?

¿Nukunabudan, nun duxku jayamamen?— jatu watan David taxnima

22 ¹jaska wabu janua David ana june kaini kai mae betsa Adulam dapi mishki kini anu iduyuken jawen betsabu inun jawen epan enabun janu jiwea tapintan bui Davidki nukua ichabun ²ja dikabi jabun jatu ichakawamisbu bika teneaiibu inun tsuada dibia jatu pakatidubuma inun Saúl xanen ibuai bechipaiaubuma David anu bua dasiabu 400 junibu jatu pawai David jatun capitán ikunkaini

³janua Moab nawabun maiwan pakea mae betsa Mispá anu kaxun Davidin Moab nawa xanen ibu yuikin:

—Diosun ea jaska wai en unandiana en epa inun en ewa jau matube jiweyukubainxanunbun en mia yukaii. Jaska min shinain keska ea yuiwe— aka xanen ibun kemakin:

—Peki. Jatu iwexanwen— aka ninkabaini

⁴kaxun jawen ibubu Moab nawa xanen ibu anu jatu iyuxun nichian jadi jabe jiweyukubainaibun janua David ikidan, janu meketi kushipa Adulam anu chintunkidanima jiweken ⁵januxun Diosun jancha yuixunika Gadin David tapinmakin:

—Nenu juneti kushipa anu janu jiwea bika teneama kainkaini minabu Judán maiwan pakea anu kaditanwen— aka jaska wa jawen jancha ninkatan jawenabuya kainkaini ni xukua jawen kena Héret anu jikia janu jiweyunibukiaki.

Davidin Saúl tenantidubia tenanma inikiaki, na janchadan

23 ²⁹Janua David kakin jabe mapuabu jatu iyui janu tsua jiweabumanu chacha unpax jawen kena En-gadi mae juneti kushipa tsua jikididubuma anu niti ika jiweyuabun

24 ¹Filisteo nawabu Saúlun jatu detekin chibankubaintani niti itan chintunkidani jatube juai tsuanda banabimakin yuikin: “Davidan, janu tsua jiweabuma En-gadi anu kashian jiweakiaki”, aka ²jaska ninkatan benimakin Israelin enabu jiwebaunabu detenamenikabu 3,000 junibu Saúlun jatu kenaxun katutan mishki mati keyatapa anu David inun jawen tsumabu benanun ika jawen detenamenikabu iyui Saúl kakunkaini ³chaxuwan janu mekekin bichimisbu mishki kenekauna dapi mishki kini uke medan jawen tsumabu eskadabeya David juneken Saúl jawenabuyadi jabianudi kai puinun ika ja mishki kini kexa anu jikikain Saúl tsautan puiaaya ⁴uintan Davidin tsumabun yuikin:

—Ja miki sinatamis mian dukun min taewaxanun Jehován mia yubaima ikis min jaska shinain keska adiwe— iwanan, yunu yunu akabu David benitan unanxubida Saúl anu kematan june Saúlun sanpu tadi kexa mextebaini ana chixtekidi kakain juneken ⁵jakia jaska waxuwen taea jawen juinti nishmai keyuxun ⁶Davidin jawenabu jatu yuikin:

—En xanen ibujaida en chakabuwai Jehován ea nemaxuki. Jehován Saúl katuniwen taea ja xanen ibuki— akin

⁷jawen tsumabu niti akin jau Saúl deteyamanunbun Davidin jatu nemaken kini anua Saúl taxnikaini kaya ⁸ja kachu David taxnikidan jui kushipawen Saúl kenakin:

—En xanen ibuun, en xanen ibuun— aka ninkatan nasukekauan Saúlun uianyan jaki mesei David danti iki maiki beti itan ana benixun ⁹Saúl yuikin:

—Tsuanda ea mia chakabuwamanun ixun min xanen ibu mia yuiabu ¿min jatu ninkamismen? ¹⁰Mishki kini anu ea dapi Jehován mia yunuxuki, min unanunan. Jehován ea jaska wamabiaya mia min en xanen ibudan, en mia tenankatsi ikama en ibubis shinaiin:

“Jhován min Saúl mia katuniwen taea xanen ibu min ikunkainmiski.” Jehován mia katuniwen taexun min jiweyunun en mia jenexuki— iwanan,

¹¹Saúlun tadi kexa mextexu sananxun uinmakin ana yuikin:

—Uinjaidawe, en xanenibun, min sanpu tadi kexa en mia mextenxu en mekenen en tsumadan. En mia tenanti pe ixuki. Min tadi kexa

besti en mia mextenxuki. En mia jaska besti waxuwen taexun en mia chakabuwakatsi ikama inun en mia achitidubia emebi chakabukin en mia jawa padanma min unandiaii. En mikidi jaskabiaken mian ea tenanun, iwanan, benakin min ea chibankubainmiski. ¹²En mia jaska waxunwen taexun nuku dabe Jehován besti jau nuku unanti wanunwen. En jawa miki sinatakaun en jashi en jawa mikidi beniamajaida ikunkainxanaii, min xanen ibukenan. Jaskawen taexun jau Jehován besti mia kupixanunwen. ¹³Nukun xenipabun yuikin: “Chakabu kainan, juni chakabu anua taxnimiski”, ipaunibuwen taea jaska shinankin min en xanen ibuki sinatakin en jawa miki jashi metaskama ikunkainxanaii. ¹⁴¿Tsua benai Israelin enabu xanen ibujaida taxnikidanxumen? ¿Min tsua chibanbidanxumen? ¿Eadan, en kaman mawa keskamenkain? ¿En masan keska daka, min ea benakin chibankin nati akaidan? ¹⁵Jaskawen taexun nuku dabe shinanjaidakin jau Jehován nuku unanti wanunwen. En jawa chakabuma Jehován unankin jau min en xanen ibu ea nemaxunkubainunwen— akin

¹⁶David janchai meneaya Saúlun jui kushipawen yuikin:

—¡Min ea peidawawa! min en bake Davidin ea jaska jancha waidan— iwanan, kaxa chakayamakin ¹⁷Saúlun jantsidi yuikin:

—En mikidi chakabu shinanbiabidanken en shinan keska ekidi shinanma min pewen min ea binumaii. ¹⁸Natian jaska min ekidi shinankin bechipaiai min ea uinmaxuki. Jehován mia anu ea yunubia min jawa ea tenanma ixuki. ¹⁹Chanimajaida tsuan taska jaki sinataiki nukutan unanuma jiwemakin nichintidumabiaken min jawa ea meama ixuki. Min ma ea atimapa binumaxunwen taexun jau Jehován mia pepawen manakukubainxanunwen. ²⁰Chanima Israelin enabu min xanen ibuxanai janu en tapinjaidaii. Min jaska jatu mekekin yunuaya jawa chakabuama dasibi Israelin enabu beni kushipabainxankanikiki. Jaska natian en mikidi unanjaidaii. ²¹Min xanen ibuaitianan, enabu dasibi ea jatu tenananyamaxanwen. Ja inun, dasibi en epan enabu ea jatu jakimawakin min yamawayamaxanun Jehován nuku ninkaya ebe yubakawe— aka

²²Jaska wa Davidin Saúl yuba ninkabaini Saúl jawen jiwe jawenduajaidakidi chintunkainaya David inun jawen tsumabu mishki mananan juneti kushipa anu buaibun

Samuel mawanikiaki, na janchadan

25 ¹Jawen mae Ramá anu Samuel jiwea anibujaidatan mawaken Israelin enabu midimajaida jaki ichaxun kaxankin menetan jawen jiwe namaki mai waibun jatun mae tibi anu inun buaibun janua David janu tsua jiweabuma anu Parán anu kanikiaki.

Mae Endor anu ainbu mukaya yukai Saúl kanikiaki, na janchadan

28 ³Ma Samuel mawaken jawen nui Israelin enabu mae tibi anua kaxanun ika beshian jaya kaxakubaini maintan ja mae Ramá anu janua kaini anu maiwashinabun yushibube janchakin jaskaxanai bebunkidi unanikabu inun tsuada mawa jawen yushinbe janchamisbu jawen maiwan pakea jidabi anua Saúlun jatu ja akin nichinmaken

⁴Israelin enabu ana detekin jatu maemanun ika Filisteo nawa detenamenikabu ichabidani bexun Israelin enabu mae betsa Sunem dapi jatun tadi jiwe puntebaunabun jatu nemanun ika Israelin enabu detenamenikabu Saúlun jatu ichawaxun mae betsa Guilboa anu jatu iyua januxun jatun tadi jiwe puntebaunabun ⁵jakia Filisteo nawa midima jati tsuan tanatidubuma jatu uin Saúl datei mesejaidakin ⁶¿jatu jaska wapa? iwanan, Saúlun Jehová yuka jakia Jehován kemakin jawa yuiamajaida inun, uxa namaiwen yuiama inun, Urim unantiwen unanmamadi inun, jawen jancha yuixunikabuwen yuimamadi ⁷jaska wa jaskatima Saúlun jawen xanen ibu bexmasbu yunukin yuikin:

—Jadi kaxun en yukai kanun janiada ainbu mawabun yushinbe janchamisenkain, ea benaxunbauntankanwen— jatu wa jawen xanen ibu bexmasbun Saúl kemakin yuikin:

—Endor anu mawabube janchamis ainbu jiweaki— akabu

⁸xanen ibukin tadi jawendua sawemis pekatan tadi betsa Saúlun sawetan ana xanen ibu keskama juni dabebe meshu medan ja ainbu anu kaxun jikitan yuikin:

—Juni betsa jawen kena en mia yuia ma mawa jawen yushin jau junun min muka kushipawen ea kenaxunwen, mia pakakatsi en mia yukaidan— aka

⁹ainbun kemakin yuikin:

—Yushibubube janchakin jaskaxanai bebunkidi unanikabu inun tsuada mawa jawen yushinbe janchamisbu nukun mai pakeanua Saúlun jatu putaima min unaiin. Min ea jaska yuimaya en mawatiduki. ¿Jaskakin min ea jaska yunuai?— aka

¹⁰Saúlun yuikin:

—Jhován kenawen taexun en mia yubaya jau tsuanda mia chakabuwayamaxanunbun Jehován ninkaya yubakin xabakabi en mia jancha waii— aka

¹¹ainbun kemakin:

—¿Tsua ea taxnimaxunwen, iwanan, min ea aki ikai?— aka Saúlun yuikin:

—Samuelin yushin ea kenaxunwen— aka

¹²kenaxuna Samuelin yushin taxnikidanai ainbun uin datejaidakin: —¡Ewaa!— itan Saúl yuikin:

—¿Jaskakin min ea padanxumen? Jabia min miaki, Saúldan— aka
¹³kemakin xanen ibu Saúlun yuikin:

—Dateyamawe. Jawa min uin ikimenkain, ea yuiwe— aka
 kemakin ainbun yuikin:

—Yushin mai anua mapekekidanai en uiain— aka
¹⁴Saúlun yukakin:

—¿Jaskada taxnikidanai min uiain?— aka
 kemakin ainbun yuikin:

—Juni mestebujaida tadiwen yabukukidanai en uiain— aka ninkatan
 Samuelki ikin unantan jaki datei danti iki maiki beti iken ¹⁵Samuelin
 Saúl yuikin:

—Ea iwekin ¿jaskakin min ea bika tenemabidanai?— aka
 kemakin Saúlun yuikin:

—Natian date paepakin en mia aki ikaii. Filisteo nawa ichapabu
 bexun nuku detenun ikaibu en jatu jaska waxun nematidumaki. Dios en
 yukabia Diosun daki ma ea jeneaki. Ea ana kemama inun jawen jancha
 yuixunikabu anu inun uxa namaiwen ea kemamaki. Jaskawen taexun en
 jatu jaska watidu min ea yuinun en mia kenaxuki— aka

¹⁶kemakin Samuelin yuikin:

—Ma miki sinatakin Jehován mia ma jenebiaimaken ¿min jaskakin
 jamen ea yukai? ¹⁷Jhován mia jaska waxanai ma ea mia yuimaimaki.
 Min xanen ibuai mia mebintan min jaibu mibe dayakunkainmis David
 xanen ibu waxanai en mia yuimaki. ¹⁸Jhován mia yunua min akin
 pewaxunama inun, Amalec nawabu min detekin keyuxanun Jehován mia
 yunubia min jaska wakin chibanma ikimaki. Jaskawen taexun Jehován
 mia ana jawa amamaki. ¹⁹Janua ja dikabi Israelin enabu Filisteo nawabu
 detenamenikabu Jehován matu jatu anu yunua matu maemaxankanikiki.
 Mia inun min juni bakebube mawatan meshukidi man eki nukuaii. Ja
 inun, chanima Filisteo nawabu Jehován medabewaya minabu Israelin
 enabu maemakin keyuxankanikiki— akin jancha watan neseken

²⁰xaba jidabi inun meshu chaitanai Saúlun jawa piamajaida juxun Samuelin
 jancha ninkai datejaidai shinanei tin ika dakaken ²¹janua Saúl jaskatan jawa
 yuiama daka ja ainbun jaska watima ja dapi kaxun uinkin yuikin:

—Min tsuma ainbu min ea yuka en mia ma medabewaki. Jaskawen
 taea mawatibiaken jawa dateama jaska min ea yunua en mia axunxuki.
²²Jaskawen taexun en jancha ninkawe. Ana kushipatan katanxun en mia
 piti eskadabes pimai piwe— aka

²³Saúlun pikatsi ikamabiaken jawen xanen ibu bexmasbu inun ainbun
 pimanun, iwanan, “Menan pidiwe. Menan pidiwe”, akawanbu atimas
 Saúlun jatu yuikin:

—Peki. En piaii— itan unanxubida benikauan dakatiki tsauyuken
²⁴⁻²⁵jabiatiandi ina awa bake xua jawen mae anu nia ainbun tesenxun

jawen nami mexte mexte axun pichantan xekiwan trigo dudu pepa bixun piti xeni inun sau inun unpax eskadabes kacha akin xaxa watiuma kameintan tsuikin keyutan ja misi inun nami jua bexun jatu bebun tsaunxuna Saúl inun jawen xanen ibu bexmasbun pikin menetan benibainkin: “En ma kiii”, abaini jabias meshu medan bunibukiaki.

**Saúl jawen juni bakebube detenamei ka jatu
tenanibukiaki, na janchadan
(1 Cr 10.1-12)**

31 ¹Mati mananan Guilboa anuxun jatu detenun ika Filisteo nawa detenamenikabu mapekebaini buxun Israelin enabube detenamekubainkin jatu maemakubainabu paxai bui Israelin enabu midima mawakubainaibun ²Saúl inun jawen juni bakebu chibankin Filisteo nawabun Jonatán inun Abinadab inun Malquisúa detekin tenantan ³Saúl besti bena chakayamakin atimas bechitan pia ichapa Saúlkidi bishku bishku akaibun ja dapi titiki ikai uin jawen datejaidakin ⁴jawen detenameti mabu buxunika jawen tsuma Saúlun yuikin:

—Jawa Diosumabun ea achitan eaya kaxekin ea bika tenematidubuki. Jau jabuan ea tenanyamanunbun mian min machatu chaipa kenujaida sitan ea detekin tenanwen— aka

jakia jawen tsuma jawen datekin jaska yunua akamawen taea jaska uintan Saúl ibubis jawen machatu chaipa maiki timatan jaki beukaini tachakax iki jawen machatu debuwen chachitan jawaida debuaya ⁵jaskatan Saúl ma mawa jawen tsumapan uintan jadi jabiaskadiai jawen machatuwen Saúl ixu keskai mawadiaya ⁶jaskai Saúl inun jawen juni bake dabe inun besti inun jawen detenameti mabu buxunmis jawen tsuma inun jawen mekenikabu jabe bukubaunmisbu jabias xabatian mawadiabun

⁷paxku napanpa uke betsaudi jiweabu inun Jene Jordán ukedi kexa betsa esteudi jiweabu jatunabu detenamenikabu paxai junebainabu jatu uintan Saúl inun jawen juni bake dabe inun besti ma mawabu unantan jatun mae tibi Israelin enabu dasibi jenebaini paxadiabainabun jatun mae tibi anu jikitan Filisteo nawabu janu niti itan jiweyuabun

⁸janua bestenbaun penamajaida Filisteo nawabun Israelin enabu tenanshinabu jatun mabu bianun ika Filisteo nawabu bukubaunkin mati Guilboa anu Saúl inun jawen juni bake dabe inun besti mawashina daka bechitan ⁹januxun Saúlun buxka textexun jawen detenameti mabu bikin mebintan ichawaxun jatun maewan jidabi janu Filisteo nawabu jiwebaunabu anu jau jatuki chanitanunbun jatu yunuabu ja mae tibi anuabun ninkatan jau jatun yushin kenwanti jiwe anuxun kenwanunbun jatu yunutan ¹⁰januxun Saúlun detenameti mabu buxun jatun yushin

Astarté kenwanti jiwe anu aduabu, Saúlun yuda inun jawen bakebun yuda buxun mae betsa Bet-sán kenekauana anu jatun yuda duntanbu¹¹ jaska Saúl ichakawakin jawen yuda duntanshinabu mae Jabés Galaad anu jiweabun ninkatan¹² Saúlun jatu medabewaniwen taexun juni mentsisipabun jabiaskas shinantan yubakabidan meshu chai tanabidani juxun Bet-sán anu jikixun Saúlun yuda inun jawen bakebun yuda dabe inun besti butexun bibainkin jatun mae Jabés anu chintunbaini buxun Jabés anuxun jatun yuda kuantan¹³ januxun jatun xau besti ichawatan ji ewapa keyatapa naman Jabés anu jatun xau maiwatan jabanuadi jatu shinain samakei 7 día inibukiaki.